





سجن فايف ستارز

دفاتر العشق والخوف

مسرحية

إبراهيم الحسيني





سلسلة شهرية تنشر النصوص المسرحية الطويلة لمختلف الأجيال وتحيى حركة النقد بدراسات نقدية

•هيئة التحرير•

رئيس التحرير
د. محمود نسيم
مدير التحرير
سعيد حجاج
سكرتير التحرير

* الآراء الواردة فى هذا الكتاب لا تعبر بالضرورة عن توجه الهيئةبل تعبر عن رأى المؤلف وتوجهه فى المقام الأول.

حقوق النشر والطباعة محفوظة للهيئة العامة لقصور الثقافة.
 يحظر إعادة النشر أو النسخ أو الاقتباس بأية صورة إلا بإذن

يحظر إعادة النسر أو النسخ أو الاقتباس باية صورة إلا بإدل كتابى من الهيئة العامة لقصور الثقافة، أو بالإشارة إلى المصدر.

سلسلة

نصوص مسرحية

تصدرها

الهيئة العامة لقصور الثقافة

رئيس مجلس الإدارة سعد عبد الرحمن أمين عام النشر محمد أبو المجد الإشراف العام صبحى موسى الإشراف الفنى د. خالد سرور

- سجن فایف ستارز
- إبراهيم الحسيني
 - الطبعة الأولى:

الهيئة العامة لقصور الثقافة القاهرة - 2012م

19.5 ×13.5

- تصميم الغلاف:
 المراجعة اللغوية: أشرف عبد الفتاح
 - رقم الإيداع :
 - الترقيم الدولى :
 المراسلات :

باسم مدير إدارة النشر 16 أشارع أمين سامي

قصر العينى

القاهرة - رقم بريدى 11561 ت: 7947891 (داخلر 180)

الجمع والإخراج :

وحدة التجهيزات الفنية

الإدارة العامة للنشر التجهيزات والطباعة: شركة الأمل للطباعة والنشر ت:23904096 سجن فايف ستارز

الأهداء

إلى المستقبل، هم وحدهم القادرون على صناعته إلى ذلك الحــب الرائع والمــشاغب إلى شادي وشذى

مقدمة

7

السَّياق المُفسُّر لعالم"سجن فايف إستار" قراءة نقدية بقلم د.سيد الإمام

ما إن عرض عليَّ «إبراهيم الحسيني»أن أكتب تقديما لمسرحيته «سبجن فايف إستار»، حتى قبلت مرحبا على الفور؛ فعلاقتي به ترجع إلى سنوات عديدة خلت، طاوية ظروف معرفة به أحسب أنها تربطنا بوشائج عميقة، مما يستقر في النفس والعقل معا، وتأبى النسيان في الوقت ذاته. ولكن تمنيت من ناحية ثانية أن أجد في العمل ما يستفزني إلى الكتابة عنه، قبل أن ألتمس دوافع الكتابة في علاقتي بكاتبه والحق أنني ما إن أنهيت قراءة نسخة «النص» التي تسلمتها منه، حتى وجدت في عام «2003» الذي رأيته مسجلا في الصفحة الأخيرة على نحو يشير إلى تاريخ كتابته العمل، ما استفزني فعليا إلى الكتابة، لا سيما وأنه تناقض بشدة مع ما تراكم في ذهني من انطباعات حول السياق التاريخي الذي يحتمل أن يكون قد توَّلد عنه، ويمكن في الوقت نفسه أن يفسره بوضوح.

ولكن بصرف النظر عن صحة هذا التاريخ، أو تدوينه بوصفه خطأ غير مقصود، فالنص يحمل عديدا من الإشارات البنبوية الصريحة والتي تكاد تكون مباشرة، تربطه على نحو وثيق بما يمكن اعتباره الحساسية الفنية لما بعد ثورة 2011/1/25، التي أدت إلى سقوط مبارك وأركان دولته، وإن طالبت بإسقاط النظام على نحو جذري. ولم يكن هذا الأثر وليد انغماس الوعى في الثورة بتداعياتها التي لم تزل ممتدة في اللحظة الراهنة بما تثيره من أسئلة حرجة وشائكة، بل وذات طابع مصيرى، متجدد في وقائع الحياة إليومية، بما تفجره من خطابات سياسية متقاطعة تفرض نفسها فرضا على الوعى العام، وتشكل- من ناحية ثانية- أطره المرجعية لتكوين المدلول الذهني لما يتبدى في التجربة الحسية لتلقى العمل من دوال ممكنة. وإذا كان فضاء «النص» يطرح صراحة مثلث العلاقة بين «الجماعات الشعبية- الحكومة- رجال الأعمال» في ضوء خلفية تتكشف وتلقى بظلالها الكثيفة من التعليقات والعبارات التي تبني الحدث وردة الفعل عليه، وفي الوقت نفسه تتبدى «التجربة الإنسانية الخاصة» قليلة الأهمية بالقياس لما هو عام وسائد، إن لم تكن مفسدة له، بالتشويش عليه، فإن العام والجمعي أولى بالاستدعاء والإيقاظ والتنشيط، لدمج فضاء النص فيه بما يفسره، ويضفي عليه إمكانية تأويله. ولعل أول ما يلفت الانتباه في فضاء «النص» ألية التظاهر والاحتجاج بالمطالب الجماعية المنعكسة في الهتافات واللافتات، على نحو يؤكد الفجوة متزايدة الاتساع بين الجماعات الشعبية والحكومة، وانسداد قنوات التواصل بينهما، مما يهدد بنية العلاقة بالتصدع والتحلل، ويحتم إعادة الصياغة بتولد بنية مغايرة، تتكشف - على مستورى أخر- تحت السخرية المرة والتهكم والمسلك الكاربكاتوري سواء في معالجة الشخصية أو الوقائع. ومن ناحية ثانية تكشف اللوحة الخامسة عن الإنترنت بما فيه من مواقع التواصل الاجتماعي ك»الفيس بوك»، بوصفها وسيلة التواصل بين نشطاء السياسة لتبادل الرأى والتخطيط للتظاهر والدعوة إليه، مما برر الإشارة إلى ثورات الربيع العربي ومنها الثورة المصرية، باعتبارها ثورات»الفيس بوك»التي هوت بالنظم الاستبدادية.

وفى اللوحة الثانية تحديدا تتكشف واحدة من هذه المظاهرات التى قامت بها الجماعات الشعبية، فى ظل طليعتها كما تتمثل فى «نشوى» الصحفية والناشطة السياسية الواعدة بما تتسم به من جرأة وصلابة واستعداد للتحدى، بينما تتغذى على السخط إزاء الأوضاع الاقتصادية المتردية التى تنحدر إليها الجماعات بما يشيع فيها من الفقر والبطالة، فتدمغ بالوجود المؤجل، وتلتهب بالحاجة إلى المأكل والمشرب والملبس والسكن، وذلك على نحو يسوغ التعبير

عنهم بأنهم «الغلابة» الذين يموتون من الجوع في الشوارع، أو يضطرون للانحراف إلى عالم الجريمة، ولو لسرقة رغيف العيش الذي يهدهدون به جوعهم، فينتهي أمرهم إلى «السجون»، التي لا تلبث بدورها أن تضيق بهم.وربما أعاد المؤلف تجسيد رؤيته لعالم الجماعات الشعبية ككتل جماهيرية غير متجانسة ، في تنويعة من الشخصيات ذات الملامس الكاريكاتورية التي يمكنها إخفاء الحس المأسوى المأزوم في المظهر الهزلي. وربما كان أهمها وأكثرها امتلاء بالدلالة، شخصية «الشحاذ» الذي لا يراه أو يشعر به أحد، مهما بالغ في التذلل لمن يسألهم العطاء، وكشف عن رضاه بتواضع مطرد في مطالبه، وألح ليجبر وعي الآخر أن يعترف بوجوه، ولكنه يحظى فقط بالاعتراف في تلك اللحظة الفارقة التي يقترف فيها «الجرم» محاولا أن يسرق ليسد رمقه أو يستر جسده، فيقبض عليه ليزج به إلى السجن، ولا يلبث أن يبقى - في السجن كما كان خارجه- شبحا غير مدرك، يعاني إنكار الوجود قبل أن يعاني ذل السؤال. فلا غرو أن تبدو حركة «الشحاذ» في الفضاء الدرامي سواء أكان في السجن أو الشارع أو خضم مظاهرة، بما يصادفها من غفلة وتجاهل أو إنكار، وكأنها حركة البعد الاقتصادي للوجود العام، معضدا بسؤال العدالة الاجتماعية، بما يصادفه من إغفال أولى الأمر وأرباب الرؤى السياسية، وفي الوقت نفسه اختزال مواجهة «الجريمة»، وإلىة

التعبير عن السخط بالتظاهر باعتباره شغبا وتهديدا للسلم العام، فى الحل الأمنى الذى يتضخم – على نحو كاريكاتوري – فى الحاجة إلى بناء مزيد من السجون!!.

غير أنضيق الجماعة الشعبية بأوضاعها إذا كان يلتمس التنفيس عنه في انفجار السخط الكلامي متفاوت الحدة في الطرقات وعلى المقاهي، وإذا كان يلتمس أحيانا المخرج في النزعة للانتحار، وإذا كان يندمج في ألية التظاهر المقترنة بمطالب «الخبز والحرية والعدالة الاجتماعية»، وإذا كان تكشف في مواقع التواصل الاجتماعي عبر الإنترنت وما شهدته من دعوات ممكنة، فكل هذا مما صب في مبررات «التورة».ولكن «النص» يربط هذه المظاهر «الاجتماعية/ السياسية»، بوعى القوى المهيمنة بوصفها «العسكر»، الذين عادوا وتجسدوا- ولو على نحو لا يخلو من هزل ساخر- في أسماء أنواع الحلوى المتداولة مثل «نبوت الغفير» و «ملبن العسكري»، و «نوحة الشاويش» و «كنافة اللواء»، كما تحسدوا في الهتاف بالدعوة إلى رفض المحاكمة العسكرية للمدنيين ورفض عسكرة المجتمع، وإلى الإفراج عن سجناء الرأى والمدونين السياسيين. فمن المنطقى أن يتجسد حكم العسكر نفسه في قمع «الضابط» شكري «للمظاهرة وتكويم أجساد المتظاهرين على المسرح، وفي حفلة التعذيب التي أقيمت لهم في السجن وتجسدت في اللوحة الرابعة،

بما انتهت إليه من تمزيق ثياب «إجلال» وانتهاك عفتها. ولا غرو أن تعيد سلطة العسكر إلى الذهن على هذا النحو – من السياق التاريخي- سلطة المجلس العسكري التي أل إليها أمر البلاد عقب تخلى «مبارك» عن الحكم في 2011/2/11، وتعالى الهتاف ضدها بالمطالب نفسها- وعلى نحو علنى واضح- في عديد من الوقائع والأحداث التي غذت- بغير شك- الخيال الإبداعي ومدته بالصور التكوينية التي يتعذر أن تسقط من الذاكرة العامة، ومنها وقائع ما يعرف بقضية «كشوف العذرية» التي لا تعدو أن تكون انتهاكا لعفة المتظاهرات بعد إلقاء القبض عليهن، وكذا وقائع مواجهات ماسبيرو الدامية المشحونة بالفتنة الطائفية بين عنصرى الأمة المصرية في أكتوبر من العام نفسه، ثم وقائع «شارع محمد محمود» في نوفمبر بما شهدته من إلقاء قنابل الغاز على المتظاهرين، وصيد أعينهم ببنادق«الخرطوش»، ثم أحداث مجلس الوزراء في ديسمبر وما تخللها من بطش وسبحل وتبول من عل على المتظاهرين، وضرب مبرح بالأحذية الغليظة حتى للنساء وقد مزقت عنهن- عفوا أو قصدا- ثيابهن. وطالما أنكرت السلطة في تصريحاتها ما مورس في ظلها من عنف مفرط وإهدار لكرامة البشر، لم تزل مظاهره محفورة في الذاكرة العامة بالصوت والصورة، مما سوغ أن تدمغ- وفي حملات منظمة أحيانا– بالكذب.

ومما يبرر انتماء النص إلى حساسية ما بعد ثورة يناير، لا قبلها، أن تردد «نشوى» في التظاهر هتاف«لا شرقية ولا غربية عايزنها تبقى «مدنية»، وهو هتاف لا يجد في الحقيقة مسوغه في أحداث الفضاء الدرامي، مما يحيله لغائب لا يتعين داخله لفهمه وتفسيره معا، إلا وعي «نشوى»الضمني بعالمها السياسي ككل بوصفه عالما أصبح مشحونا بما يهدد بزوال فكرة «المدنية». والواقع أن هذا العالم يعود ليتجاوب مع السياق التاريخ لما بعد ثورة يناير، ويلتمس منه بنية شارحة، فيبدو وكأنه ردُّ على هتاف أطياف الإسلام السياسي: لا شرقية ولا غربية عايزنها تبقى إسلامية، في إطار الاستقطاب السياسي الحاد الذي شهدته وتشهده البلاد بين «مدنية- دينية» الدولة بعد الثورة، ولم تكن تعرفه أو تتوجس منه قبلها وفي السياق نفسه قد يتكشف- ولو على نحو ضمني- الدور الوظيفي لشخصية «الشيخ جابر» الذي طالما كان نزيل السجن-على نحو ما توحى اللوحة الرابعة- ووظفت السلطة خطابه الديني وقدرته على إقناع الخارجين على «أولى الأمر» باسم الله ورسوله أن يلتزموا بطاعة السلطة.ولكن جابرا لم يعد يميز ما إذا كان محدثه مسلما أو مسيحيا، ولم يعد خطابه يشدد على طاعة ولى الأمر، بل يدعو المتظاهرين إلى التماس العذر للسلطة ومساعدتها والامتناع عن التظاهر والاعتصام وإثارة الشغب، فلا هو أرضى المتظاهرين، وإن كان في لهجة لا تخلو من مودة، ولا أرضى السلطة ممثلة في المأمور، وربما كان يخفى حلمه الدفين- الذي كشف عنه في اللوحة الأخيرة- في إزاحة من بيدهم الأمر، والانفراد دونهم- في الوقت نفسه- بمقود السلطة. وعلى هذا النحو فإن «الشيخ جابر» في تحولات علاقته بالسلطة داخل النص، يعيد إنتاج علاقة أطياف الإسلام السياسي بالسلطة في السياق التاريخي قبل وبعد يناير، وشكل التهديد الضمني بإمكانة تحويل هوية الدولة من مدنية إلى دينية لا تخلو من طابع «ثيوقر اطي-theocratic».

وعلى أية حال إذا كانت علاقة «الحكومة/السلطة الجماعات الشعبية» تؤسسها السلطة على القهر والقمع، وتجاهل الاحتياجات الأساسية بما يدمر حتى الحد الأدنى من أسباب الحياة الكريمة، ومن ثمة تثبيت وضعهم فى الوعى بوصفهم «مخلوقات غريبة» تستدعى الاحتقار، فعلى الطرف المقابل هناك علاقة «السلطة رجال الأعمال» الذين يجسدهم «سليم المنزلاوي» فى فضاء النص ومجتمعه الافتراضى، وتؤسس بوصفها زواجا بين السلطة والمال والبلطجة، ولا تخلو من تدليل مفرط، بل وتواطؤ مع الفساد الذى يعنى بتجريف الثروة العامة وتنوع أشكال نزحها إلى خارج البلاد، كما يعنى استغلال النفوذ للمشاركة فى الثروة المنهوبة بأى سبيل ممكن، مقابل توفير الأمن والأمان أو فرص الهرب من الوقوع

تحت طائلة القانون، أو الامتيازات الاجتماعية في المعيشة المرفهة حتى إذا كانت في سجن فليكن «فايف إستار».وعلى هذا النحو فإن علاقة» السلطة- رجال الأعمال» تتخذ دائما شكل المساومات والنزوع لعقد الصفقات، التي تسقط«إنسانية الجماعة الشعبية»من حسابها، على نحو ما يتضح من اللوحة الثالثة.ولا غرو أن يتعزز في ضوء هذه العلاقة وعى الجماعات بغيبة «العدالة» بين أبناء المجتمع الواحد، بما يبرر مظاهر سخطها بالتمرد والتظاهر والإضراب عن العمل والاعتصام، وما يتخلل كل هذا من مطالب معلنة في الهتافات واللافتات، ومن ناحية ثانية تتعزز مبررات أنماط مغايرة من السلوك تكتم السخط وتنحى الكرامة الإنسانية، وتميل إلى مسايرة الأمر الواقع، وقبول خدمة «السلطة» أو «رجال الأعمال» وتسقط ما تجود به من منافع ممكنة، أيا كانت هذه الخدمة، مثلما يفعل «نافع»، باسمه النمطى ذي الدلالة المباشرة.

ولكى ينتج النص وحدته الفنية المكنة، ونسيج متماسك على نحو ما، كان لا بد وأن يوفر أساسا يجمع من يمثل «رجال الأعمال» بالنماذج التى تمثل «الجماعة الشعبية» فى حيز محدد من الزمان والمكان، وذلك على أرضية السلطة التى تشكل بالتأكيد رأس المثلث، على نحو يكشف عن التوتر بينهما، ويفجر الخطابات المتقاطعة، ويسوغ الملاحاة بينهما، نحو إنتاج الخطاب الكلي.ومن هنا يتكشف

النص عن فضاء «السجن» بدلالته على «تقييد الحرية» و «كف الإرادة»، وبوصفه عقابا على «جرم» في حق المجتمع و «انحراف» عن مثله العليا المفترضة، فهو في النهاية - من منظور بنيوي - آلية ضبط اجتماعي بالغة الأهمية لكل «نظام» يستمد تماسكه وهبيته من إعمال القانون وسيادته. ولكن لما كان «العالم» لدى المؤلف لا يعدو أن يكون «فوضى» غير مفهومة على نحو يثير اليأس؛ إذ يعتمد خلف مظهره المتجهم بأسباب القمع وألوان القسوة على الاستهانة بالقانون وقابلية انتهاكه والتحايل عليه بالثروة والتواطؤ مع أربابها، كما لا يبإلى بما يعد «حقوقا إنسانية»، فقد مال المؤلف إلى روح «الكاريكاتير» في المعالجة ليبني فضاءً مزدوجا ينطلق من التطوير المفاجئ والمبالغ فيه والصادم في الوقت نفسه لعنابر السجن التي تخصص لأمثال «سليم المنزلاوي»، فإذا بها سجون مستقلة ومنفصلة تحمل درجة النجوم الخمسة وكأنها فنادق تفيض بألوان الراحة والرفاهية، وقد تزيد درجته إلى «ست» بمتعة استثنائية مثل «فاتنة» تدلك أصابع القدم، وقد تزيد إلى «سبع» بقبوله أن يقدم الخدمة الجنسية لمن يشاء ليلا!، وذلك مقابل «السجن» الحكومي المخصص لأبناء الجماعات الشعبية، وتتراجع فيه كافة الشروط المواتية للحياة الكريمة، والحرص على الكرامة الإنسانية.

ولما كان العالم فوضى خارج القانون ومتجاوز لمفهوم النظام

المتماسك، فالفضاء بثنائية السجن من المنطقى أن يطرح «نماذج شخصية» منحرفة أو مجرمة، تتوزع بين ثنائية السجن في الوقت نفسه، وتعمق من التناقض الاجتماعي، فالذي سرق رغيف خبز ليس أكثر من لص حقير وتافه لا يستحق إلا السجن الحكومي، أما الذي يستولي على مليارات البنوك، فهو السيد المطاع الذي تقف سلطة السجن ذي النجوم الخمسة على تلبية أوامره والسهر على راحته.ولما كان العالم فوضى مرة أخرى، فلا بد من «خطأ التقدير» غير المقصود سواء أمكن الاعتذار عنه، أو لم يستدع هذا الاعتذار مهما كانت تداعيات الإمعان فيه، وقد تعرض «سليم» لهذا الخطأ حين قذف به في عنبر العامة إثر القبض عليه لأنه آثر البقاء في البلاد ولم ينتو الهرب منها بعد استيلائه على قرض ضخم من البنك، رغم ما هيأته السلطات من فرص الهرب الأمن بثروته لقاء ما يساومونه عليه، وكان هذا الخطأ- من ناحية أخرى- الذريعة التي ربطت بين عالمي «العامة- رجال الأعمال»، ومهدت للملاحاة والتوتر بينهما، لا سيما بعد اعتذار «المأمور» عن هذا الخطأ غير المقصود، بل واصطحابه «سليم» إلى حيث سجنه المرفه.وريما شاء المؤلف المقابلة بين الخطأ المفترض في حق «سليم» والخطأ الذي ارتكبه موظف في حق «إجلال/أنثي» بحيث حذف الألف وأصبحت «جلال/ ذكر»، وأمعنت السلطات في هذا الخطأ دون اعتذار أو محاولة تصحيح حتى زجوا بها فى السجن بين الرجال، تحاول دائما – وعلى نحو غير مجد – أن تقنعهم بأنها «أنثي» وتستعيد قصة الخطأ فى حقها، غير أن «المؤلف» لم يبال بما إذا كان وجودها بين الرجال فى السجن يمكن تصديقه فى ظل هذا الخطأ نفسه، ولم يبال بما إذا كان تصديق أنها أنثى ينتظر فقط أن يمزق ثوبها فى حفلة تعذيب وربما أغرته مفارقة وجود «أنثي» بين الرجال فى السجن، ليفجر ما أمكنه من فكاهة، وليعمق أثر «التعذيب»، واغتصابها كأنثى على يد المأمور، وليجد فيها بعد ذلك المدلكة لأصابع «سليم».

وإذا كان «المؤلف» وجد في خطأ الدفع بسليم في عنبر العامة، الذريعة في اللوحة الأولى لتحريك تناقضات الفضاء في مجموعه، لينسجه في سلسلة من اللوحات المنفصلة والمتصلة في الوقت نفسه، فقد اعتمد من ناحية ثانية لا على تطوير موقف الشخصيات من السجن بالسعى إلى التحرر منه، ولكن على غواية «الامتيازات» التي يمكن أن يحصل عليها العامة داخل السجن ذي النجوم الخمسة، ومن ثمة تتولد رغبتهم في الانتقال إليه، بديلا للسجن الحكومي، بينما تسود نظرة سليم والمأمور إليهم بوصفهم «مخلوقات غريبة» اقترفت جرائم حقيرة لا تمنحهم الحق في الامتيازات، ولا تتمخض استعارة السجن إلا عن السؤال عمن يحكمه. وعلى هذا النحو يصبح «السجن» جوهر رؤية العالم عند المؤلف، وإن تنوعت أسباب الحياة فيه، ولا شك أن هذه الرؤية تتردد بتنويعة مغايرة في تلك الأشكال الهندسية التى يرسمها «زكي» على الأرض – فى اللوحة الأولي – ليجد فيها أى من زملائه السجن الملائم، الذى يمكنه أن يستقر فيه محكوما بخوفه، ولذا لا يستطيع أن يرسم شكلا مناسبا لإجلال لأنها تتأرجح بين هوية «الأنثى» التى تصر عليها، وهوية «الذكر» التى فرضها عليها الخطأ الحكومي.

وفي السياق نفسه يصبح سؤال «الحرية» مزعجا ومدمرا ينذر بالجنون، ورغم أنه سؤال يتجاوز الحدود المكنة لفضاء النص المزدوج وللحركة الهازلة بين طرفي ثنائيته، إلا أن المؤلف أصر على طرحه بما ينطوى عليه من تزيد، وذلك حينما يخل بالبناء النمطي لسليم، كرجل أعمال فاجر لا يبإلى بأية قيم اجتماعية أو وطنية أو مشاعر إنسانية، ويوقعه في حب «نشوى» التي تهيج الدنيا عليه رافضة ممارسته التي تحدد مشروع وجوده وتنتهي به إلى أن يصبح موضع احتقارها. فلو أنه بقى داخل سجن «نمطه» الذي يسوغ له أن يحطم إرادتها ويقضى وطره منها ولو غصبا عنها، لبقى في مأمن من الجنون، ولكنه فجأة - وفي اللوحة الأخيرة-يعبر عن حبه الصادق لها ورغبته في أن تبادله حبا بحب، وتقبل عليه بإرادتها الحرة، فإذا هي الأمنية المستحيلة التحقيق لما يحيق بها من أسباب الوأد والرفض المفهوم والمبرر معًا، وإن تطلب عمقًا فلسفيًّا يجلو جوانبه، بعيدًا عن ثنائية السجن الحكومي، والسجن ذي النجوم الخمسة.

شخصيات النص

النزخصيات الرئيسية

سلب مرا في في الحراق الحرب وقد يعرف الحرب وقد يعرف الحرب وقد يعرف الجنون ..

ش مهتمة بالحرية أكثر من اهتمامها بالحب ...

لـأهـــــور: كرحركه الأوامر والأموال أكثر مما تحركه

...

الحساكم: حارس كال شيء رغم أنه لا يستطيع

وسف: سجين، لكنه يمتلك أسرار الخيال.

ك يعرف الخوف، لكنه لم يعد لهابه ..

المحمد باحث عن مكان فوق الأرض الم

الشيخ جابد: له قدرة سحرية على الاقناع الآوراع

ليس دومًا ...

ناف ع: يتشكل حسب الطلب والزمن ...

الشحاذ: تركيبة بشرية خاصة جدًا ... يسكن الهامش ويتمرد فيه ...

شكري: مجرد حارس على الأمن الذي يعتقده..

شخصيات ثانوية أخرى:

مسئول (1)، (2)، (3)

مسجون (1)، (2)، (3)

حرامي (1)، (2)، (3)

منظاهر (1)، (2)، (3)

محروس، امرأة (1)، (2)

رجل (1)، (2)

ماسح أحذية

بائع جوال

الرجل

مساجين

متظاهرون

مهمشون ...

اللوحة الأولى منتخب الحكومة ضد منتخب الشعب

[حجرة سجن لا يوجد بها سوى باب وفتحة شباك عالية، المساجين يتفرقون داخلها، أحدهم يرسم تليفزيونًا على الحائط، بينما آخر يمسك بإصبع من الطباشير ويرسم على الأرض دوائر ومثلثات ومربعات و يُسارع المساجين بالدخول إليها، يوجد أيضًا اثنان من المساجين بمفردهما على أحد الجوانب، أحدهما يحاول إقناع الأخر بشيء ما ...]

إجلال: صدقني يا معلم نافع أنا بنت ...

نافع: يوووووه .. ارحمنى بقى يا جلال، هوّه كل يوم فى نفس الموال ده ...؟!

إجلال: يا معلم نافع .. إجلال .. اسمى إجلال مش جلال ... الراجل بتاع مكتب تسجيل المواليد نسى الألف ..

نافع: [باحتقار] يعنى عايزنى أكدب الحكومة اللي بتقول

عليك راجل وحطاك في سجن الرجالة، عيب عليك تتبرى من جنسك وتعمل واحدة ست، إخص، أعوذ بالله ...

إجلال: يا معلم أنا

نافع: إخرس بقى، واوعى كده لتشبهنى ... [يتركها "نافع" ويتجه ناحية "يوسف" الذي يرسم التليفزيون] ...

يوسف: وده بقى مفتاح الباور، يعنى بضغطة بسيطة يشتغل التليفزيون ...

نافع: وحياة أبوك يا يوسف هات لنا القناة الأولى عليها ماتش دلوقتي ...

يوسف: حاضر .. [يُدير مُفتاحًا] .. أهه ...

[يتجه الجميع ناحية التليفزيون، يُحاولون الجلوس أمامه ليشاهدوا المباراة .. " زكى "يوقفهم لأنهم يدوسون على أشكاله الهندسية التى يرسمها ..]

(كسي: حاسبوا يا جماعة ما تدوسوش على الخطوط، كل واحد يخش جوّة الشكل بتاعه [يوقف أحدهم، يسأله] .. أنا كنت راسم لك إيه تتسجن جواه ...؟

محروس: دايرة ...

زكى: وخرجت منها ليه ...؟

محروس: یا عم ها أشوف الماتش و أرجع جواها تانی .. مش هاطیر یعنی ...

الشحاذ: [مواجهًا "زكى" بينما زكى لا يراه] عايزك ترسم لى مربع يكون براح كده وتسجنى جوّاه، أصلى نفسى ألف على أركانه الأربعة وأشحت منها براحتى، بيتهيألى كده ها أبقى مستريح أكتر ... انت

سامعنی …؟

زكــــي: ما هو طول ما انت عايش فى دور المُزة وبتقول على نفسك مرة، ما حدش ها يهوّب ناحيتك ..

إجللا: يا عم أنا ست، وبنت بنوت كمان، ما أنا لسه قايله إن الراجل بتاع مكتب المواليد ...

نافع: [مُقاطعًا] هش بقى .. الماتش بدأ ..

[يصمت الجميع، ويجلسون أمام التليفزيون المرسوم على الحائط، يلتقط "يوسف" فردة حذائه ليُعلق على المباراة ..]

يوسف: النهارده الأهلى بيلعب مع الزمالك والريس بذات نفسه حاضر الماتش ...

نافع: [مستنكرًا] هش ...

يوسف: [مُعدلا من كلماته] قصدى المنتخب القومى بيلعب مع المنتخب العربي ... وابن الريّس بذات نفسه ...

نافع: هش...

يوسف: طب مع المنتخب الأوروبي ...

نافع: هـِش ...

يوسف: طب المنتخب العربى بيلعب مع المنتخب الأمريكي، وإسرائيل بذات نفسها ...

نافع: هش

يوسف: برضه هش .. طب ماتفهمونا يا اخوانا ... هوّه ده ماتش دوًلى واللا محلى [لا أحد يرد] طيب منتخب الحكومة بيلعب مع منتخب الشعب، ومنتخب المساجين

الغلابة بيتفرج من مدرجات سجن طرة ..

ز**كـــي**: جميل، كمل ..

بوسف: الكورة دلوقتي مع منتخب الحكومة ..

إجالال: عادى، ما هي طول عمرها معاهم ...

بوسف: خدها الوزير أبو راس كبيرة قطعها منه الوزير أبو

كرش، نط بينهم الوزير أبو ودان طويلة وشاط الكورة شوطة مفترية، لكن الحوت أبو دبورة ودقنمخططه كان صاحى ومسك الكورة بقرف ..

نافع: يقرف براحته، فرصته وجاتله ويعمل فيها اللي هوّه عايزة ..

يوسف: والكورة لسه مع منتخب الحكومة، شاطها الوزير أبو جيوب مخرومة، نط جيوب مخرومة، نط بينهم واحد من الشعب ... حاسب ... حاسب ... للأسف دهسوه تانى ...

إجلال: وتالت ...

زكـــى: ورابع ...

يوسف: وخامس ...

نافع: وألف .. إيه مالكم ..؟ ما هوّه ده الطبيعى ... عايزين إيه يعنى ...؟

الشحان: [يظهر كأنه يُحدث نفسه] أنا ماليش ف الكورة ..أنا عايز حد يشحتنى رغيف واللا نُص سيجارة أغير بيهم ريقى، ولو مافيش هاوافق بحتة لقمه ناشفة زى إمبارح .. حد سامعنى ..؟

يوسف: منتخب الشعب متبهدل .. كُله بيعرج دلوقتي

وعمره ما طال ولا كورة .. إيه ده ..؟! مش ممكن !! لأول مرة في حياته منتخب الشعب بياخد الكورة وبيمشي بيها، ها يعوض خسارته، منتخب الشعب شاط .. شاط .. للأسف، الكورة طلعت بره ..

يوووه .. منجوس طول عمره ..

الجميع:

زكــــى: الأمل في الشوط التاني ...

پوسف:

نافع:

نافع:

سليم:

أنا شايف دلوقتي منتخب الشعب بيسخّن جامد...

حاسبوا با رجاله تسخين بس، ماحدش بولع في حد ... [أصوات ضوضاء أتية من الخارج .. يُفتح باب السجن، يلقى بقوّة من خارج الباب بمسجون جديد، "سليم"، قوى البنيه، في الخمسين من عمره، يعود الباب إلى الانغلاق، يتأمل المساجين الوافد

الجديد ..]

[ينهره بعنف] قوم ياد اقف على رجليك ...

[بنهض واقفًا] حاضر ..

معاك سحاير …؟

[يناولها له] أه ... اتفضل ...

فيه فلوس ...؟ نافع:

[يعطيها له أيضًا] اتفضل ..

نافع: البدلة دى بتاعتك ...؟ [يتحسسها ...]

سليم: ما تتفضلها لو عايز ...!!

محروس: [يصفعه] ما دام الريس شاور على البدلة تقلع

على طول ..

سليم: حاضر .. [يظع الجاكيت]

نافع: والبنطلون ...

محروس: والقميص ...

نافع: والجزمة ..

محروس: والكرافتة ..

نافع: والـ

إجلال: لأ أرجوكم أنا بنكسف ...

نافع: إنت تاني برضه يا جلال ...

[يخلع "سليم" ملابسه فلا يبقى عليه إلا ملابسه الداخلية، يأخذ المساجين قطع ملابسه وهم فرحين بها، يتقدم "محروس منه"، يجذبه من فانلته ...]

محروس: تعال ياد افتح التليفزيون ...

سلیم: حاضر [یُحاول فتحه] ایه ده ...؟ دا فیه فیلم عربی شنقًال أهه ..

نافع: هات القناة التانية عاوزين الفيلم الأمريكاني ...

سليم: هه .. حاضر [يُحدث أصواتًا بفمه وكأنه يُحرك مؤشر القنوات] أصل الإيريال شكله كده مش مظبوط [ل" نافع"] ما تأمر يا معلم حد يطلع يظبطه ...

نافع: هه .. ماشى .. اطلع ياد يا محروس اظبط الإيريال .. محروس: [مُندهشًا] الإيريال .. حاضر .. بس افتح لى يا معلم

باب السجن وأنا أطلع على طول .. فريره ...

نافع: [مُفكرًا] هه .. كده يعنى [مواجهًا "سليم"] بتزنقنى يا روح أمك ..؟ [ثم للآخرين] اطفى ياد انت وهوه التليفزيون ده [مشيرًا لـ "سليم"] تعرف ياد عجين الفلاحة ؟

سليم: مابلاش يا معلم أنا ..

نافع: إخرس ياد خالص واعملى العجين واركنلى الفلاحه على جمب...

سليم: أفنطهم من بعض يعنى .. حاضر ...

[يتراقص "سليم"، يضحك الجميع، يُشير له "نافع" بالتوقف ..]

نافع: تعرف نومة العازب ...؟

سليم: حاضر..

نافع: هوه إيه اللي حاضر ...؟

سليم: ها اعمل لك النومة [ينام في وضع مُضحك] ...

نافع: إنت ياد اسمك إيه ...؟

سليم: سليم المنزلاوي ...

نافع: لأ .. اسمك نادية ...

سليم: لأ .. سليم بقى ...

نافع: باقول لك نادية ...

[يلتف الجميع حول "سليم "وهم يرفعون أياديهم استعدادًا لضربه ...]

سلبم: مش تقولوا كده .. أنا نادية، من زمان حتى وأنا اسمى نادية، بس الناس بتستهبل وتقولى يا سليم [ساخرًا] قال سليم قال [يتجه لا محروس"] أنا اسمى إيه باد ..؟!

محروس: سليم .. قصدى

سليم: [مقاطعًا] إنت حمار، أنا نادية .. [ل" نافع "] رجالتك مش عارفين أى حاجة، بيقول عليًّا سليم، سليم دا يطلع مين ...؟!

نافع: [مُشيرًا لرجاله] أدبوه ..

[يلتف الجميع حول "محروس"، يضربونه، نسمع صرخاته، يُفتح الباب ويظهر مأمور السجن ..]

نافع: [بخوف] حضرة المأمور ...

[ينكمش الجميع في الأركان، يظل "سليم "واقفاً في منتصف الحجرة، يدخل المأمور منتفخًا، واضعًا عصاته الغليظة تحت إبطه، ينظر للمساجين في خيلاء، يلمح "سليم" واقفًا بين المساجين، يرتمى تحت قدميه محاولا تقبيلهما ...]

المأمور: ارحمنی یا سلیم بیه، أرجوك تسامحنی، أبوس صوابع رجلك ما تزعلش منی، فیه سوء تفاهم حصل، وها أصلحه حالاً..

سليم: [يشده من ياقته] .. فرز قوم .. وقولى الأول إنت مين ..؟! المأمور: أنا .. بعد إذن سيادتك المأمور ...

سليم: وجاى هنا ليه في العنبر ...؟

المأمور: أنا جاى أقع فى عرض سيادتك وأمشى على طول ..

سليم: واديك وقعت .. غور بقى ...

المأمور: أرجوك ماتهزأنيش أكتر من كده، وتعالى معايا نشرب

القهوة في مكتبى وناكل سندوتشين لحمة حضرتك،

وبعدين نشوف ها نعمل إيه ...

نافع: [مُندهشًا] مين ده ...؟!!

بوسف: ده المأمور ...

نافع: لأيا حمار، الراجل التاني ...

يوسف: احنا ما نعرفهوش، احنا نعرف نادية بس ...

نافع: ده أنا اللي نادية

[يرتمى هو الأخر تحت قدمى سليم ويحاول تقبيلهما]

المأمور: فيه إيه ...؟ مين ده ..؟!

نافع: أنا نادية يا بيه ...

المأمور: نادية يعنى إيه ...؟ واحدة ست يعنى ...؟!

إجلال: لأيابيه، دا واحد راجل، أنا اللي واحدة ست، وجابوني

سجن الرجاله غلط ... أرجوك صدقنى ... حتى شوف صوتى، شوف جسمى، شوف مشيتى، شوف ... أصل

الراجل بتاع مكتب المواليد ...

المأمور: فيه إيه ...؟ دا عنبر سجن ولا عنبر في الخانكة ...؟

[لحظة إضاءة مُتغيّرة، ترتكن " إجلال " إلى أحد الجوانب، يقترب منها " يوسف " مواسيًا " ..]

بوسف: [محاولاً مسح دمعتها] مايستاهلوش ...

إجلال: [من بين دموعها] همُّمه مين اللي مايستاهلوش يا يوسف ...

بوسف: [مُشيرًا من حوله] الناس دى، واللى بيعملوه فينا، واللى للى الله هايعملوه ... مايستاهلوش دمعة مننا ...

إجلال: غصب عنى ... الواحدة بتصعب عليها نفسها ...

يوسف: لو ضعفنا ها يفرحوا فينا، ويحققوا غرضهم مننا، الضعف معناه الانتجار أو الجنون ...

إجلال: ليه ... همُّه سجنوك في سجن النسا وقالوا عليك واحدة ست انت كمان ..؟

پوسف: ياريت ... ماكانش ده بقى حالى ...

[يضحكان .. تعود الإضاءة إلى وضعها الأول، سليم يحمل ملا بسه ...]

المأمور: اتفضل يا سليم بيه .. دول شكلهم مجانين سليم: لحظة واحدة بس .. [للمساجين] مين فيكوا نادية ...؟

نافع: [بخجل] أنا نادية .. أستاهل أكون نادية، ورشا كمان لو حبيت ..

سليم: [أمرًا]طب ارقصى يا نادية ..

نافع: حاضر [يُنفذ] ...

سلبم: [يُلقى أوامره تباعًا إلى "نافع" الذى يُنفذ فورًا ...]
اعمليلى عجين الفلاحة يا نادية.. نوم العازب .. المتجوز..
المطلق ..المخلوع، ارقصى من غير ما تهزى وسطك..
اتكلمى من غير صوت .. اتشعلقى فى الهوا واطلعى
للسقف .. [يشير لنخلة مرسومة على الحائط] واطلعيلى
النخلة دى وهاتيلى بلح بسرعة ..

"سليم" يضحك بشدة، يشاركه المساجين الضحك، بينما "نافع" منزويا في أحد الأركان .. ثم يقف المأمور بجوار المساجين، وهم يرفعون جميعًا أياديهم بالتحية العسكرية لـ "سليم" أثناء خروجه، إلى أن يخرج، ثم يتبعه المأمور، بعدها ينظر" نافع" بغضب للجميع ...]

يوسف: [مذعورًا] والله ما أنا ... همه اللي ضحكوا الأول ماليش دعوة ...

زكى ولا أنا .. دا أنا غلبان ...

يوسف: وأدى يا سيدى نومة العازب ...

زكــــى: والقرداتي ...

إجلال: والفلاحة وعجينها ...

نافع: [صارخًا فيهم] كلاب ... كلكوا كلاب ...

[الجميع يدورون حول "نافع "، مقلدين مشية وصوت الكلاب بشكل كاريكاتيرى ... يتأملهم "نافع "لحظة، ثم يدخل معهم ضمن إطار الحالة المرحة ... تخفت الإضاءة إلى درجة الإظلام، يعقب ذلك فتح باب عنبر السجن ليدخل منه" الشيخ جابر "وسط هالة من الضوء تأتى معه ... يرتعد الجميع ... يتراجعون إلى الوراء ...]

الشيخ جابر: ماتخافوش ...دا أنا الشيخ جابر جاى وجايبلكم معايا كلام ربنا ... ولا هوه كلام ربنا بقى بيخوّف ...

يوسف: [مُترددًا] لأ .. كلامكم انتوا اللي بيخوّف ...

الشیخ جابر: یا ابنی احنا مجرد أسباب، وکل واحد مننا لیه دور مرسوم ...

بوسف: ربنا عُمره ما بيحب الأذى لحد ...

نافع: [مُتدخلا] كفاية ... اللي عنده كلمة يبلعها ...

قول لى يا شيخ جابر ... مين المقصود المرة دى ...؟

الشيخ جابر: زكى وجلال ويوسف ...

الشحاذ: هوه أنا ليه ماحدش بيعبرنى خالص .. أنا مش موجود واللا إيه ..؟! كُنت فاكر إنهم ها يخرجونى النهاردة، ما بيتهيأليش يكونوا نسيوا، طب هوّه أنا في السجن فعلاً واللا بيتهيألي [صارخًا] يا ناس يا هوه حد فيكم شايفنى ..؟

[يرتعد " زكى " بقوّة، يقترب منه الشيخ " جابر "، يربت على كتفه ..]

زكي: [مُتلعثمًا] أنا ماعملتش حاجة ... ها تعملوا فينا إيه يا شيخ جابر ...؟

الشیخ جابر: إهدی یا زکی یا ابنی، وحد الله ومتخافش، ما حدش ها یعمل فیکوا حاجة ...

(كسي: [منهمرًا في مونولوج ذاتي] أنا .. أنا عمري ما خرجت بره الدايرة بتاعتي ... دايمًا بالف وأدور

فيها زي التور .. عُمري ما اشتكيت، ولمّا بيبقي الرزق مقضيني باحمد ربنا، ولما بيضيق الحال باصير، ما اتمريتش أبدًا ع الحرُّ اس ... اللي كانت بتقول عليه الحكومة كنت باعمله، ماكنتش باسأل لإنى أصلا مش فاهم هيه بتعمل إيه، وكنت باحمد رينا إن هيه سايبانا نعيش في بلدها ومازهقتش مننا، بس شكلها زهقت ع الأخر .. بصراحه .. ما احنا نزهيّق برضه ...

الشيخ جابر: أعوذ بالله ...

احنا نزهيّق وهممه يكفروا فينا ... نزهيّق وهممه يولعوا زكــــى: ويحرقوا فننا ...

الشيخ جابر: استغفر الله ...

نزهيّق وهمه يقتلوا ويسحلوا فينا ... زكــــى:

> لا حول ولا قوّة إلا بالله ... الشيخ جابر:

خلاص لو كفرانين مننا بالشكل ده يسببونا زکـــــى: ويرحلوا ... يا قطة لا تلسعيني ولا أكل من بلحك ...

[إظلام تدريجي وما زال "زكي "في هذيانه...]

اللوحة الثانية تصريح بالانتحار ...؟

[ميدان عام، مجموعة من الطرُق المتقاطعة، يظهر مقهى، بينما تتراص مجموعة أخرى من المحال المتنوعه الناس يمرون فى جميع الاتجاهات، بعضهم يجلس ليقرأ الصحف، أو يدخن، يثرثر، أو يجلس وحيدًا، يمر من وقت لآخر بعض الباعة الجائلين .. يظهر «مليجى «وهو يجلس بجوار أحدهم ...]

مليجي: [يجلس على المقهى، لزميله] الواحد قرف، ماعادش حاحة لنها طعم ..

الرجل: [وهو يقرأ الجريدة] فعلاً، الكدب بقى يطلع لينا لسانه فى كل حتة، والبلد بقت عامله زى ما تكون فريسة عيّانه والكل بينهش فيهابسنانه، احنا مش ها نقوم ننتحر بقى ...؟ النيل قرُيّب من هنا ..

[يمر أحد الباعة الجائلين وهو ينادى على بضاعته ...]

البائع: ياللا حلاوة نبوت الغفير، ومعانا ملبن العسكرى ونوجة الشاويش ..

[تخرج امرأتان من السوبر ماركت ...]

امرأة (1): أجيب لك يا اختى نبوت الغفير للعيال ...؟

امرأة (2): بلا خوته، ما عندهم كنافة اللوا من إمبارح ..

مليجي: [مُعلقًا] يا ساتر هيه البلد حصل فيها إيه ...؟ غفير، عسكرى، شاويش، ولوا .. هيه حلويات ولا حرب ...؟!!

الرجل: والله ما حد بقى عارف حاجه .. منين ما تمشى تلاقى الناس مش طابقه نفسها ...

[يفتح أحدهم الراديو ...]

ص. الراديو: أعلن مصدر مسئول أن الحكومة تُفكر في بناء سجون جديدة لكى تستطيع استيعاب العدد المتزايد يوميًا من مُثيرى الشغب والفوضى والمفسدين ومخربى البلاد ... كما حذر المصدر وبلهجة غاضبة ومتنرفزة جدًا كافة المواطنين من إثارة الفتن بين عنصرى الأمة ..

[يخفت الصوت تدريجيًا، يدخل ماسح الأحذية وهو يخبط على صندوقه منادياً]

ماسح الأحذبة: امسح جزمتك بخمسه جنيه، إلحق وامسح، اللي بيروح السجن ويلاقوا جزمته وسخة بيكدروه ..

سجن إيه يا راجل انت .. ؟

مليجي:

الشحاذ

ماسح الأحذية: ما اعرفش، كل أصحابى اللى اتاخدوا تحرى كدروهم عشان جزمهم وسخة .. مع إنهم أصلاً حافيين طول عمرهم ..

[داخلا بنفس ملابسة التي كان يرتديها في السجن] حسنة لله .. أي حاجة ها أقبلها... فلوس، لقمة، هدمة قديمة، جزمة، كلمة طيبة مافيش مانع، طبطبة على ضهرى مش هاقول لأ، حد يشاركنى البكا مايضرش، أي حاجة بس حد يعبرنى، أنا طالع من السجن ومأشفر.

[أصوات صخب وضوضاء آتية من الخارج ... تدخل مظاهرة تقودها "نشوى"]

نشوى: لا شرقية ولا غربية عايزينها تبقى مدنية ... الجمع: [يرددون] لا شرقية ولا غربية عايزينها تبقى مدنية ..

[المتظاهرون يحملون العديد من اللافتات التي تُندد بالسجون وتنادي بالحرية ؛ منها مثلاً "لالسجناء الرأي، لالعسكرة المجتمع، افرجوا عن المدونين، يسقط الظلم، لاللمحاكمات العسكرية للمدنيين، ... « يدخل الضابط "شكري" ومن وراءه بعض العساكر ليواجه "نشوى" والمتظاهرين ...]

شکری: انتی برضه ...؟ مش من مصلحتك اللی انتی بتعملیه ده ...

نشوى: وهوه من مصلحة مين يا حضرة الظابط إن نُص الشعب يتسجن ...؟

شكرى: كل بلاد العالم فيها سجون، ومن حق أى نظام يسجن أى حد يهدد أمن البلد ...

نشوي: وهمُّه بقى الغلابة دول اللي بيهددوا أمن البلد،

اللى بيسرق رغيف عيش عشان ياكل، واللى بيطالب بوظيفة ومش لاقى، واللى بيرفع صوته بشكوى، واللى بيحاول يعيش ويقول يا حيط دارينى، واللى مش قادر يغير هدمته لا فى الصيف ولا فى الشتا، واللى بيقول أو يكتب رأى، واللى، واللى ... هم دول يا حضرة الظابط اللى انتوا شايفينهم بيهددوا أمن البلد ...؟!

شكرى: أنا بحذرك ... كفاية اللى إنتى كتبتيه فى الجرايد وقلتيه فى تليفزيونات المعارضة ...

نشوي:

اللى بيهددوا أمن البلد انت عارفهم كويس،ومش محتاجنى أقول لك عليهم ... الغلابة بيموتوا كل يوم فى الشوارع من الجوع، والكبار حتى لو اتسجنوا بتحطوهم فى سجن خمس نجوم، زى سليم المنزلاوى بتاعكم وعشرات غيره ..

منظاهر(1): لالتحالف منتخب الحكومة مع منتخب رجال الأعمال والبلطجية ..

منظاهر(2): لا للكذب الحصرى جوّه المسئول المصرى .. الضابط: [للمتظاهرين] اخرس يا روح أمك انت وهوه .. [صارخًا في العساكر] لمولى العيال دى ...

[تحدث معركة بين العساكر والمتظاهرين، تغيرات في الإضاءة، حالة من الصخب تعم الفضاء المسرحي، ناس يجرون بلافتات، أخرون يصرخون، أصوات طلقات رصاص، قنابل دخان، ...]

منظاهر(1): البلد كلها مخنوقة، وشكلها هاتنفجر ...

منظاهر (2): مش عارفين نعيش ...

متظاهر (3): الخوف مالى الشوارع ...

منظاهر (4): الجوع بيرمح زى المُهر حوالينا ...

منظاهر (5): الحرب شغاله جوّه وبرّه، ومفيش حتة نحس فيها بأمان ...

منظاهر (1): النار بتحرق كل حاجة ...

منظاهر (2): حاسبوا ... اللي ها يتكلم ها يتسجن ...

منظاهر (3): واللي ها يمشي في الشارع ها يتسجن ...

منظاهر (4): وحتى اللي ها يقعد جوّه بيته ها يتسجن ...

منظاهر (5): كفاية بقى .. احنا كده كده في سجن ..

[يتساقط المتظاهرون على خشبة المسرح واحدًا بعد الآخر، تشكل أجسادهم كومة كبيرة يُحيط بها العساكر، المتظاهرون يُحاولون رفع اللافتات، لكنهم لايستطيعون ، "نشوى "يحاصرها عسكريان، الضابط "شكرى" يقف منتصرًا، وهو يُشير للجمهور بعلامة النصر في فرح طفولى ... يظهر صوت حركة مؤشر الراديو ...]

صوت الراديو: أعلن مصدر مسئول أن هناك مجموعة من

البلطجية قد شنوا هجومًا عنيفًا على رجال الأمن، مما أسفر عن وجود "واوات صغنونة" فى أيادى الأفراد والضباط، بينما قُتل عشرة من البلطجية، وهناك ثلاثمائة فى حالة خطرة، وتم القبض على حوالى سبعمائة منهم، وجارى الحكم عليهم بأحكام تتراوح ما بين السجن سنة والإعدام ...

[اثنان من العساكر يُزاحمون الضابط في وقفته، وهم يُشيرون معه بعلامة النصر للجمهور ... إظلام تدريجي ...]

اللوحة الثالثة مخلوقات غريبة اسمها الشعب

[حُجرة سجن "سليم" تظهر وكأنها حُجرة داخل فندق خمس نجوم، المأمور يقف فى ذُعر وفزع شديدين، بينما نجد "سليم" يجلس مسترخيًا على أريكة مريحة يأكل بعض الفواكة الموضوعة أمامه، ويقرأ الجرائد، كما توجد فتاة جميلة تدلك له جسده ..]

سلبم : [للمأمور دون أن ينظر له] س : إنتوا قبضتوا علياً ليه ..؟

المأمور: [مذعورًا كطفل صغير] جنيا افندم حضرتك واخد قروض من البنوك خمسه وخمسين مليار دولار ومش ناوى تهرب بيهم، عملنالك جواز سفر مضروب، وجبنالك طيارة خاصة، وانت ... قصدى حضرتك متصمم إنك ماتهربش، والبلد دلوقتى على كف عفريت، ونصر رجال الأعمال والوزرا في السجن،

ومسير الدورييجي عليك، واحنا بصراحة مايخلصناش إن الخمسه وخمسين مليار .. قصدى حضرتك تروح في أبو نكلة ...

سليم: س: طبوما بعتوش تحققوا معايا في مكتبي ليه ...؟ عشان نظهريا افندم قدام الناس .. قصدى المخلوقات المأموره الغريبة اللي اسمها الشعب دي بنوع من العدالة والديمقر اطية، خاصةً والبلد في حالة انفجار ...

سليم: وظهرتوا ...؟

المأمور: يا باشا دا الناس في الشوارع ...

> قصدك المخلوقات الغريبة ... سلىم:

المأمور : أيوه ... الكائنات دية ماشية مش طايقة نفسها من

الفرح، جالها اليوم اللي تفتخر بيه وتقول عشنا وشنُفنا حيتان البلد في السجن ...

> بس اللي أنا فيه ده مش سجن، ده فندق ... سليم:

دا أقل سجن يليق بسيادتك .. أصل حضرتك ماشئفتش المأمور: سجون الوزرا والرؤسا والملوك عامله ازاى ...

سليم: أفخم من كده ...؟

يوووه، أنا بذات نفسى أتمنى ربنا يكتبهالى وأشرّف المأمورة فيها يومن ..

سليم: ليه ...خمس نجوم ..؟!

المأمور: ستة يا افندم .. النجمة الزيادة دى عشان التدليك ..

سليم: [للفتاة] إنتى بقى اللى مكلفانى نجمة زيادة ...؟

الفناة: وبالليل ها أكلف معاليك نجمة سابعة ...

سلیم: ده شغل عالی قوی وناعم ولذیذ وشکله ها یکلفنی

الفناة: لأيا افندم ... السبع نجوم كلهم هدية لمعاليك ...

سليم: أمال إيه السجن الحقير بتاع التليفزيون والنظة والحاجات دى ...؟

المأمور: دا سجن المخلوقات الغريبة يا افندم، وحضرتك دخلته غلط، وأنا عاقبت المسئول عن ده ...

سلبم: بس تعرف ... تجربة لطيفة جدا إن الواحد يتعرف على أنواع السجون بنفسه ...

المأمور: احنا أسفين يا افندم ...

سليم: تعرف إن ده كمان أوحى لى بفكرة عبقرية، بس مجنونة شويه ...

المأمور: باكرر أسفى يا افندم [يُخرج دوسيها مليئًا بالأوراق ويُقدمه لا "سليم"] اتفضل سيادتك ..

سليم: إيه ده ...؟!

المأمور: ده من فوق يا افندم ...

سلبم: من فوق يعنى إيه ..؟ هو لسه فيه حد فوق ..! [ينظر للأوراق ويقرأ] سيادة وزير الد. لسه فيه وزرا أهه .. [يعاود القراءة] سيادة رئيس الد ... [يتوقف] إيه ده يا سيادة المأمور .. مين دول ..? [يقرأ] إقرار بالسفر، دمغات ورسوم بخمسة مليار دولار .. تنازل عن نئص القروض والأملاك .. بدل رشوة .. بدل استغلال ..

وبدل ما حد تاني ياخئدهم .. مين دول ...؟!!

المأمور: دول اللي فوق يا افندم ...

سلبم: فوق مين بالظبط ... ؟! [إشارات لا معنى محدد لها من المأمور] الخُلاصة يعنى عايزين تسفرونى م البلد، أو بمعنى أصح تهربونى وتقبضوا منى ...

المأمور: عشان الفتنة يا افندم ... معاليك عارف الناس ونقها، وطول ما جنابك هنا مش ها يبطلوا كلام، وده ها يطمعهم إنهم يطلبوا همم كمان قروض ...

سلبم: المخلوقات الغريبة دى ممكن تاخد قروض عشان إيه ...؟

المأمور: عشان حاجات كتير معاليك، أهه.. [يتناول مجموعة كبيرة من الدوسيهات ...] جابيها معايا .. اتفضل يا

سيدى [يقرأ] محمد أبو صباع طالب قرض خمس تلاف جنبه عشان بعمل منحل والضمان 13 خلبة خشب زان، خالد أبو دماغ طالب ألفين جنيه عشان يتجوّز والضمان خطيبته، سعيد أبو ودان طالب ميت جنيه عشان يعالج ودانه، والضمان نجاح العملية، وده، وده ... [يرمى الدوسيهات واحدًا بعد الآخر إلى أن يصل إلى أخرها، دوسيهًا كبيرًا ..] وده واحد غلس جدًّا إسمه برعى أبو ركب بعت طلبات ييجى بألف حنيه عشان طالب سألفه ألف وسيعميت حنيه بشتري بيهم بوتاجاز ناقص في جهاز بنته ... تصوّر سيادتك بقى لو ما سافرتش، الناس دى كلها ها تقوم علينا و تعمل لنا مشاكل و يطالبوا بالمثل ...

يطالبوا بالمثل ١٩٠٠٠

حصل .. أهه [يُخرج دوسيهًا] أشرف أبو دراع [يقرأ] وبما أن رجل الأعمال سليم المنزلاوى أخذ قروضًا بعشرات المليارات، أطالب الحكومة بالموافقة على إعطائى مبلغ تسعمائة وخمس وسبعون جنيهًا لبدء مشروع للتجارة في فوانيس رمضان الصينى .. تسعمية خمسة وسبعين جنيه ..؟ إيه البقف ده ..؟

إحبسوه .. إحبسوهم كلهم ..

سلىم:

سلىم:

المأمور:

المأمور: حصل يا افندم ...

سليم: حبستوهم كلهم ..؟

المأمور: حصل يا افندم ...

سلبم: خلاص ... يبقى مافيش داعى أسافر بقى ...

المأمور: أهاليهم بيطالبوا بالقروض بدالهم ...

سليم: احبسوهم همه كمان ...

المأمور: حبسنا نصهم، والنص التاني أوعدك مع تقفيلة

السنة دى ..

سليم: طبوها تسفروني إمتى ...؟

المأمور: خلال أسبوع .. ودى التذاكر، ودا الجواز، وقصر

بيطل ع المحيط، فيه عربيات، وشالالات، ... وكل حاجة

مترتبة ..

سلیم: ولورفضت ...؟

المأمور: ها يتخرب بيتي يا افندم ...

سليم: طب سيبنى أفكر .. [يُناوله الجريدة التي يقرأ فيها]

أه .. إحبسولي الصحفية اللي اسمها نشوى دى، عمالة

تهاجم فينا عمال على بطال ..

المأمور: حصل يا افندم ...

سليم: هوه إيه اللي حصل ...؟!

المأمور: حبسناها ...

سليم: كده .. يبقى عايز أشوفها

المأمور: نجيبها لغاية هنا يا افندم [يستحث الفتاة على

الكلام] ...

الفناة: ليه يا سليم بيه ...؟ تدليكي مش عاجبك واللا إيه ...؟

سلبم: هه .. مش قصدى .. لكن .. دا نوع تانى من التدليك .. وبالمرة هاتلى الواد اللى اسمه نافع بتاع سجن

المخلوقات الغريبة .. المأمور: أوامر معاليك ...

[يخرج المأمور، يقترب "سليم" من الفتاة باشتهاء، والتى تبتعد عنه مذعورة ...]

الفناة: [بانفعال] مالك يا سليم بيه .. فيه إيه ..؟ انت صدقت إنى بتاعة تدليك ونجمة سابعة واللا إيه ... أنا هنا غصب عنى حضرتك ... همه اللى عملوا فيا كده ... سليم: [وهو يتأملها عن قرب] الصوت ده مش غريب علياً ... ولا الخلقة دى ... قوليلى .. احنا اتقابلنا قبل كده ..؟ الفناة: [تخلع باروكتها لنكتشف أنها "إجلال"] إتقابلنا في السجن ...

سليم: نعميا أختى ٠٠٠٠؟

إجلال: في سجن المخلوقات الغريبة ...

سليم: [مُتذكرًا] أيوه ... أيوه .. انتى ...

إجـلال: إجلال ...

سلبم: إنتى اللي كُنتى راجل . . . ما شاء الله يومين في السجن خلوكي مُزة زي القمر . . .

إجلال: لأيا سليم بيه ..أنا زى القمر م الأول ... الحكومة هيه اللي ماكانتش مُعترفة بيًا ...

سلبم: وإيه اللي حصل خلاهم يعترفوا بيكي ...؟

إجلال: مش ها يعجبك اللي حصل ... فبلاش منه أحسن ...

سلیم: یا ستی أدینا بنتسلی ... احکی احکی ...

إجلال: [بتأثر] بعد ما حضرتك خرجت مع المأمور جم خدونا من العنبر، مشونا في طرقات طويلة وضيقة، حسينا من كُتر اللف والدوران إننا في متاهة، وفي الآخر انفتحت بوابة حديد، ودخلونا أوضة ضلمه مفيهاش نقطة نور ... الدنيا جوّاها كانت برد شديد، بقينا عاملين زي شوية ميّتين مرميين جوّه تلاجة ...

[يرتعد جسدها كأن إحساس البرودة قد عاودها مرّةً أخرى ... تحاول استكمال الحكى لكنها لا تستطيع ... إظلام تدريجى ... فقط تظل بؤرة ضوئية صغيرة على وجه إجلال وهى تنظر للعالم بتحد ظاهر ...]

اللوحة الرابعة تشكيلة عذاب

[تتسع بؤرة الإضاءة من على وجه "إجلال "لتشمل المكان كله .. الإضاءة زرقاء موحية بالبرودة الشديدة .. "المأمور "يجلس مسترخيًا، حذاؤه في وجه الجميع، "الشيخ جابر" يقف وهو مشغول بتحريك سبحته ... أعين "إجلال، يوسف، زكى "معصوبة بشرائط سوداء ...]

الشيخ جابر: عملت اللى أقدر عليه ... بس دماغهم أنشف م الحجر ...

المأمور: يبقى تنكسر يا شيخ جابر ...

الشيخ جابر: حلمك علينا شوية يا سيادة المأمور ... دول

شباب صغيرين ولسه ناقصهم خبرات كتيرة فى الحياة، وبرضه لسه عندى عشم إنهم يسمعوا كلامى ويرجعوا عن اللي هم فيه ...

المأمـور:

المرة دي ...

الشيخ جابر:

[للثلاثة] قلتوا إيه يا أولاد ... [لا أحد يرد] ... البلد دى بلدكم وانتوا أول ناس لازم تاخدوا بالكم منها ... [لا أحد يرد] ... ولازم برضه تعذروا الحكومة،

وريّنا يا شيخ جابر، يمكن رينا ينفخ في صورتك

... [لا أحد يرد] ... ولازم برضه تعذروا الحكومة، هيه مش ها تقدر تعمل كل حاجة بنفسها، فيه دور كبير واقع علينا لازم كلنا نقوم بيه ونساعدها ... لكن مظاهرات عمال على بطال، واحتجاجات هنا، واعتصامات هناك، وشغب في كل حتة .. مينفعش ... [لا أحد يرد .. يزيد من حدة لهجته] ساكتين ليه ... أنا باكلمكم ... واللا هافضل أهاتي كده لوحدى ... صلوا ع النبي كده واهدوا وكل حاجة ها تبقى تمام ...

پوسف:

يا سيدنا الشيخ بقالك أسبوع بتنصحنا باسم القرآن والسنة، ومجاش على بالك إنك تسأل الناس اللى انت بتنصحهم دول إذا كانوا كلهم مسلمين واللا فيهم مسيحيين ...

الشيخ جابر: بوسف:

هوه فیه حد مسیحی یا ابنی فیکم ...؟! أنا یا شیخ جابر . . . وده معناه إنهم جابونا هنا من غیر مابعرفوا احنا مین . . .

الشيخ جابر:

بتنفع مع النصراني ...

يـوسـف:

مش لمّا تكون عارف م الأول إنه نصراني يا شيخ حاير ...

الموعظة في حد ذاتها زي ما بتنفع مع المسلم

. . . . المأمور: [يُزي

[يُرْيح الشيخ جابر جانبًا] شوية انت كده يا

شيخ جابر، إركن على جنب عشان دول شوية عيال ملاعين، وأنا كُنت متأكد إن الطريقة دى عُمرها ما هتنفع معاهم ... أنا مإيهمنيش إذا

كنتوا مسلمين واللا مسيحيين ولا عفاريت

زرق . . . كُلُه ها ياخد بالجزمة . . . [يضع عصاته

الغليظة على كتف " زكى "] إنت ...

زكـــي:

المأمور:

زكــــى:

تفتكر ماورناش شئغلانة في البلد غيركم ...

أنا عن نفسى قالت كل اللى أعرفه، وماعنديش

حاجة تاني أقولها ...

افندم ...

يـوسـف:

لو مش مصدقنا إعرضنا ع النيابة وهيه تحقق معانا بمعرفتها ...

المأمور:

[مُنفعلاً] مش عاين أسمع الكلمة دى تانى ... أنا هنا النيابة والمحكمة والسجن وكل حاجة ... ويعدين

أنا مش عائز اعترافات من حد، إحنا عارفين انتوا عملتوا إيه، وبرضه عارفين ها نحاسبكم ازاى ... [ك "يوسف "] انت یا أبو لسان طویل، مش مسکوك وانت دایر بتلف في الشوارع ترسم ع الحيطان، وتشتم في الحكومة والعسكر، وتخانق في دبان وشك ... [لا "زكى "] وانت يا سئهن ... عاملي فيها أهبل وعبيط ومالكش دعوة بأي حاجة، مش إتمسكت في مظاهرة وكنت بتشيل قنابل الدخان ترميها ع العساكر ...إنت علماني ياد . يعنى شكلك كده كافر [ثم بحدة] مين ياد المصاب اللى كنت شايله على ضهرك ويتجرى بيه، وكان بيوشوشك بيقولك إيه ...؟ [صارخًا فيه] انطق ... كان ىىقولك إنه ...؟

زكي، كان بيوصينى أروح لولاده وأقولهم أبوكوا مات علشان يجيب لكم حاجة حلوة ... كان عايز يجيبلكم الحربة ...

المأمور: [مستهزءًا] الحرية . . . ما كان يجيبلهم الديب من ديله أحسن . . شايف اللوع يا شيخ جابر ، دول مش هايقروا بالحقيقة إلا بعد مانربيهم . .

الشيخ جابر:

أنا شايف بعد إذنك إننا عملنا اللي علينا، وبيتهيألي أي حاجة بعد كده تبقى من إختصاص النيابة زي ما بيقولوا، ولما تثبت عليهم أي تُهم ابقوا اعملوا فيهم اللي انتوا عايزينه ...

المأمور:

إنت كمان يا شيخ جابر ... ده اللي احنا جايبينك

عشانه... فين كلامك الناعم، مابقاش ليه تأثير

ليه ...؟ فين قال الله وقال الرسول، فين طاعة ولى

الأمر ...؟! اتغيرت يا جابر ومبقاش يهمك رضانا

عنك، أخرتها تقولى النيابة في وشي . . . [صارخًا

بالنداء] شكرى ...

لا حول ولا قوة إلا بالله ...ليه كده بس ..؟!

[داخلاً] افندم ...

عارف ها تتصرف ازای ۰۰۰۰

عارف سعادتك ...

وريني ٠٠٠

[متدخلة] بعد إذنك يا افندم أنا ليًّا ظروف خاصة ...

إيه الصوت المنسوّن ده ...؟! ما تتكلم عدل ...

أنا ست فعلاً ، وقُلت لسيادتك الكلام ده قبل كده ...

يعنى إيه ست ... ؟! عملت عملية واتقلبت واللا إيه ... ؟!

الشيخ جابر:

شکري:

المأمور:

شكري:

المأمور:

إجلال: المأمور:

المأمور:

إجـــلال:

لأ .. أصل الموضوع ...

المأمور:

موضوع إيه وزفت إيه .. إركنلى على جمب شويه دلوقتى [ل" يوسف، زكى، الشيخ جابر] وانتوا ياللا فارقونا، شوف شغلك يا شكرى ... [يخرج الجميع، يتوجه ل" إجلال "] فرجنى بقى إيه ظروفك ...

[يقترب منها .. يجذب ملابسها، يمزقها، تصرخ الجلال المعاملتها بعنف، بحركة دفاعية لا إرادية منها تصفعه على وجهه بيفاجأ بذلك، يتحول إلى العنف فينهال عليها بالضرب والسحل، بؤرة ضوئية صغيرة يظهر الشحاذ داخلها وهو يتم تعذيبه ...]

الشحاذ:

كفاية حرام عليكم ..هامووت ..

المأمور:

[صارخًا بعنف] شكرى ... [حفل التعذيب مستمر .. تتعالى صرخات " إجلال "، يفاجأ المأمور بأنها إمرأة فعلا، يتراجع للحظة ..] إيه ده انتى ست

فعلاً.. ؟!

[يعاود الهجوم عليها مرة أخرى بشراسه أكثر .. تقع على الأرض، يرتمى فوقها ... خفوت تدريجى للإضاءة ... تظهر صرخات وبؤر أخرى ...]

يوسف: بلاش الخاذوق أرجوك .. بلاش .. بلاش .. يا ولاد الـ

زكى أنا إتعلقت ييجى ميت مرة، دراعى ها يتكسر، بلاش الكهربا، كفاية بقى .. دا حرام ... حرام ... اأأه ...

[يظهر صوت إجلال من المشهد السابق من دون أن نراها وكأنها تنهى ما بدأته من حكى ...]

صوت إجلال: مش قلتلك مش ها يعجبك اللى حصل يا سليم بيه إنتوا فى دنيا تانيه مالهاش دعوة باللى احنا عايشين فيها ...

[تعود الصرخات ... تُشكل إيقاعًا منتظمًا وحزينًا ... ثم إظلام تدريجي ...]

اللوحة الخامسة أنا بوست رجُّل حضرتك واللا لسةُ ...؟

مجموعة من المساجين يظهرون من خلف نوافذ حُجرة "سليم" في السجن، يضربون بأياديهم على قطع من الصفيح فيصدرون إيقاعا منتظما وهم يهتفون ...]

المساجين: [معًا] الحرية ... الحرية ... ضد السجن والسجان ...

سلبم: [صارخًا في المأمور] مين دول ...؟!

المأمور: [صارخًا بدوره] شكري ... مشى العيال دي ..

سليم: أنا باسالك مين دول ...؟

المأمور: مساجين يا افندم ...

سليم: ما أنا عارف إنهم زفت ... إيه اللي جابهم لغاية

أوضتي ...؟

المأمور: ماتاخدش في بال معاليك ... دى شوية مظاهرات

عبيطه ... الزفته اللي اسمها نشوى دعت ليها ع الفيس .

بوك ...

سليم: وهمه المساجين بيخشوا ع الإنترنت ...؟!

المأمور: التعليمات بتقول لأ .. بسه مُمه بيخشوا ... ازاى ما

عرفش ...

سليم: أنا مش قلت لك تجيبلي البت دى ...

المأمور: حصل ... وجبناها بره هيه ونافع زى ما معاليك أمرت ...

[يُشير لأحدهم، تدخل "نشوى"، بينما يجرى "نافع" باتجاه "سليم"، ويرتمى على الأرض مُتعلقًا بساقيه مُحاولاً تقبيل حذائه تصمت أصوات المظاهرة ...]

نافع: أرجوك يا سليم بيه .. إرحمني .. أنا تحت أمرك ..

ما كانش قصدى والله ومستعد أعمل لحضرتك نطة العفريت ونومة العجين وفلاحة العازب ...

سلبم: اخرس بقى .. خلاص [يتقدم من "نشوى" يُواجهها]
.. إنتى بقى نشوى ...؟

نشوى: وانت بقى سليم المنزلاوى ...؟

نافع: [مُنفعلاً] سليم باشا يا بنت الـ

سليم: [يستوقفه] هش ..

نشوی: ما تسیبه یضرب یا سلیم ... باشا ..

المأمور: أنا اللي ها اضربك .. إزاى تكلمي الباشا بالشكل

ده ۱۱۹۰۰۰

سلبم: [صارخًا] بقولكوا اخرسوا .. [إضاءة على النوافذ، حيث تظهر مجموعة المساجين وهم يُتابعون

الموقف ...]

نشوى: واضح إن حضرتك المأمور هنا يا سليم باشا ..

هدومك ملكية وعندك بودى جارد ... يعنى بتتحكم فينا بره السجن وجوّاه كمان ..

المساجين: [عبر إيقاعات منتظمة تارة ومتقطعة تارات أخرى]
الحرية ... الحرية..

سلبم: لو عایزة تخرجی أنا تحت أمرك، بس انتی تؤمری ... فشوی: والتمن ...؟

سلبم: لأ .. دا انتى شايفانى وحش قوى .. من غير تمن طبعًا ...

نشوى: من يوم ما سمعت عنك وأنا أعرف إنك بتبيع وتشترى فى كل حاجه، وعُمرك ما عملت حساب لحد ... دلوقتى حاسه إنك عايز تبيع وتشترى فيًّا أنا كمان ... لأيا سليم بيه، ما فيش حد بيقدر يشترى كل حاجه ...

المأمور: [وهو يُحاول ضربها] ما باحبش أسمع كلمة لأه دي هذا أبدًا

سليم: لو ما سكتش ها اضطر أحبسك ...

مسجون (1): سليم بيه ها يحبس المأمور ...

مسجون (2): يستاهل دا مأمور مقرف ...

المساجين: [يهتفون] يعيش سليم بيه ..

نشوى: اخرسوا . .

المساجين: [يغيرون هتافهم] يسقط سليم بيه ..

سلبم: انتى حطانى فى دماغك ليه ...؟

نشوى: أنا مافيش بينى وبينك عداوة عشان احطك في

دماغي، أنا مع الحق، مع الناس الغلابة ...

سليم: وأنا بقى اللي ضدهم ...؟!!

نشوى: الفلوس اللي انت بتتمرغ فيها دى فلوس الشعب،

والهباب الأزرق اللى بتتاجر فيه بيقتل الشعب، يعنى

بتقتل الناس بفلوسهم ..

سليم: دا كلام كبير وممكن يوديكي في داهية ..

نشوى: على إيدك انت واللي زيك الشعب كله راح في

داهية ..

[يأخذها "سليم" بعيدًا، تركز عليهما بؤرة ضوئية ...]

سلبم: ما تسيبك م الشعب وخليكي فنفسك شويه ...

نشوى: ما أقدرش، الشعب ده أبويا وأمى وعيلتى وأصحابى،

لو سبتهم مابقاش أنا، هابقي ساعتها واحده تانيه ...

سلبم: أنا عايزك واحده تانيه ..وإذا كان على كل الناس

دول عتبريهم خرجوا .. المهم طلباتك انتى ..

نشوى: ماليش طلبات غير طلبات الناس ...

سليم: لو رفعت عصاية، الناس دى كلها ها تجرى ومش

ها يفضل قدامي غيرك ...

نشوى: مشصحيح ..وانتمش بتساومنى على سكوتى دلوقتى

إلا لأن الناس دى كلها معايا ..

سليم: جرنان خاص، وفيلا محندقة كده وشوية وظايف

لاخواتك، بيتهيألى نبقى كده حبايب ..؟

نشوى: لأ ...

سليم: دماغك ناشفة، بس خلى بالك، دماغى أنشف منك ...

نشوى: وأنا متأكدة إن نفسى أطول من نفسك ..

[تتسع بؤرة الإضاءة، تتركه "نشوى "، تنضم للمساجين، يهتفون وراءها ...]

نشوى: مسجون عاده ومسجون بيه ..لا للتفرقه ديه يا

المساجين: [يرددون] مسجون عاده ومسجون بيه، لا للتفرقه ديه يا بيه

[تستدیر " نشوی " لتخرج والمساجین من وراءها، ینادی " سلیم " علیها، تتوقف ...]

سليم: نشوى .. نسيت اسألك على حاجه .. لسه من عيلتك كام واحد بره السجن ..؟

نشوی: کتیر قوی ..

سليم: تحبى تستنيهم في السجن واللا أخرجك

تشوفيهم ...؟

مسجون (1) ؛ ظلم ...

مسجون (2): استعباد ...

مسجون (3): دا حتى العيال سبجنوهم ..

مسجون (1): ماحدش بيهتف ليه يا جماعه ...؟

مسجون (2): [يهتف] يسقط ... يعيش [المساجين يرددون] يسقط ... يعيش ... مسجون (3): مين اللي يسقط ومين اللي يعيش ...؟

مسجون (2): كل واحد عارف نفسه بقى ... هوّه أنا مُخى

دفتر ...[یخرجون ومعهم "نشوی " ...]

سلبم: [لنفسه] بنت جدعة .. بس يا خسارة دماغها

جزمه قديمه..

المأمور: أروقهالك يا سليم بيه ..؟

سليم: لأ أرجوك بلاش، إوعوا تعملوا فيها حاجه، أنا

عايزها سليمة كده ..؟

[يدخل "شكرى "مسرعًا ليقف أمام المأمور متحيياً ...]

شكري: تمام يا افندم .. الوارد الجديد وصل ..

المأمور: ودول كام واحد ...؟

شكرى: حوالى 150 ألف مسجون ...

المأمور: يخرب بيوتكوا، ها اوديهم فين دول يا شكرى ...؟

السجن مافيهوش ولا خرم إبره ...

شكري: طب أتصرف سيادتك ازاى ...؟

المأمور: رجعهم ...

شكري: ما أقدرش ...

المأمور: ودِّيهم سجن تاني ...

شكري: كل السجون مليانة ...

المأمور: طب نعمل إيه ...؟

[يدور الضابط والمأمور حول بعضهما، "سليم" يُقلب فكره ما داخل رأسه، "نافع" يقف كالعبيط بجواره ..]

سليم: والله فكرة .. وتبقى حل كويس للإشكال ده ..

نافع: فكرة .. يعنى إيه فكرة ...؟

سلبم: [ل"نافع"] وبغباءك ده تبقى أصلح واحد ليها ...

نافع: أنا خدامك يا سليم باشا .. [يُحاول تقبيل قدميه]

أنا بوست رجل حضرتك واللالسه ...؟

المأمور: [ما زال يدور] نعمل إيه ...؟

الضابط: [يدور معه] نعمل إيه ...؟

سليم: خلاص أنا لقيت الحل ..

المأمور: هه ...الحل ...؟! ... إلحقني بيه ..

[يتوقف المأمور والضابط، الدهشة تبدو على وجهيهما، "نافع " ما زال مُتعلقًا بأرجل "سليم" .. إظلام تدريجي ..]

اللوحة السادسة توكيل اللامؤاخذة

[مجموعة من المسئولين يجلسون حول طاولة اجتماعات مع الحاكم الذى يرتدى بذلة مليئة بالنياشين المبالغ فيها، يخبطون بأقلامهم على المنضدة بإيقاع عشوائى، يبدو عليهم التفكير الشديد، يقومون، يدورون حول المنضدة، يلعبون لعبة الكراسى الموسيقية أثناء حديثهم ..]

الحاكم: إزاى الحال يوصل بينا لكده .. ؟! إزاى السجون

مش مقضية ..؟ همُه المساجين قد إيه بالظبط ...؟

مسئول (1): حوالي سبعين في الميه من الشعب يا افندم ...

دا غير الصحفيين والكتاب والفنانين والقضاة

ووكلاء النيابه ...

الحاكم: كلهم مجرمين ..

مسئول (2): فيهم اللى مجرم على اللى بيستهبل، على اللى داخل على إجرام، على اللى مش مجرم خالص وخنقنا بنزاهة أمه ...

الحاكم: يعنى تنويعة كده ..

مسئول (2): مظبوط ..

الحاكم: طب ما تخرجوا شوية منهم ...

مسئول (3): خرجنا شوية فعلاً، ورجعنا حبسناهم تاني ..

الحاكم: وقعوا في الجريمة تاني ...؟

مسئول (3): إحنا لسه ها نستنى يا افندم لما يقعوا في

الجريمة ... إحنا قبضنا عليهم بفضل جهاز

التحرى عن الجريمة واكتشافها قبل وقوعها ..

مسئول (2): كلهم يا افندم عندهم استعداد كبير

للجريمة ..

الحاكم: طب والحل ...؟

مسئول (1): نبنى سجون جديدة، زى ما أعلنًا قبل كده ...

الحاكم: ما انتوا عارفين ... مافيش فلوس ...

مسئول (1): صحيح، ما احنا خدناها ..

مسئول (2): ننفيهم برّه البلاد ..

الحاكم: دا برضه متكلف ...

مسئول (3): يبقى نقتلهم ...

العام العالمي، وحقوق الإنسان والكلام ده ..

مسئول (3): طب نموت شوية ونقول انتحروا ...

الحاكم: بقت مفقوسة ... وبرضه ده مش ها يحل

المشكلة ..

مسئول (2): أنا بقول ناخد القرشينات ونهرب..

الحاكم: ونسيب البلد كده سداح مداح، ثم ها نسيبها

ونهرب من مين ما هي بتاعتنا ...

[فى كل مرة أثناء لعبة الكراسى الموسيقية يكسب الحاكم، وفى نهاية اللعبة يظل هو الوحيد المحتفظ بالكرسى الأخير ...]

مسئول (3): طب نعمل إيه ..؟

مسئول (2): نعمل حرب ونموّتهم فيها ..

مسئول (3): أو نتنازل عنهم لدولة تانية ...

مسئول (1): أنا بقول نبيعهم فى سوق العبيد، لسه فيه أماكن كتير فى العالم فيها الحكايه دى شغاله ..

الحاكم: بصراحة يستاهلوا، بس أنا شايف نفكهم ونبيعهم

حته حته أحسن ...

مسئول (1): حل مش بطال ..أنا ها آخد توكيل العيون ...

مسئول (2): وأنا القلب والكبد والكلى والمصارين ...

مسئول (3): وأنا توكيل اللا مؤاخذة ..

[أثناء دورانهم داخل اللعبة، يدخل "سليم" يتبعه "نافع"، وهو حاملا حقيبة ممتلئة، يصعد "سليم" فوق طاولة الاجتماعات ...]

سليم: كفاية دوخه .. أنا عندى الحل ...

الحاكم: [صارخًا] مين ده ...؟ وإيه اللي دخله هنا ...؟!

مسئول (1): دا سليم بيه المنزلاوي رجل الأعمال المشهور ...

الحاكم: مشده اللى أنا أصدرت قرار سرى بهروبه من البلد ...؟

مسئول (1): مظبوط هوه ..

الحاكم: طبليه ما هربش واحنا عاملين مش واخدين

بالنا ...؟!

سليم: دا من حسن حظكوا عشان أجيلكم النهارده

ومعايا الحل لموضوع المساجين ..

الحاكم: [فرحًا كالطفل] بجد .. إيه هوه ...؟

المسئولين: [يُدبدبون بأقدامهم كالأطفال] إيه هوه ...؟ إيه هوه ...؟

سليم: سجن استثماري قطاع خاص ...

المسئولين: [بدهشة] هه ... ازاى يعنى ...؟!

سليم: سجن استثمارى للى يقدر يدفع، ومعظم اللى

بيستجنوا اليومين دول يقدروا يدفعوا ..

الحاكم: واللي ما يقدرش ...؟

سليم: يتحط فى سجن الحكومة أبو تليفزيون ونخله ع الحيط ..

الحاكم: وضع أكتر ...

سليم: بدل ما الأغنيا يقضوا سجنهم في زنازين

خمس نجوم .. أه أسف .. ست نجوم عشان التدليك، أو في مستشفى ... يتسجنوا في

السجن الاستثماري ..

الحاكم: طب وانت مستفيد إيه من كده ...؟

سليم: تخصيص حصة من ميزانية الحكومة ليًا،

بالإضافة للعمولات اللي ها أخدها من النزلاء ...

الحاكم: قصدك اللي هناخدها ..

سليم: مش ها نختلف ..

مسئول (1): أفهم من كده إن احنا وافقنا ..؟

الحاكم: هيه فكرة مش بطالة .. وأهو الواحد يضمن

مستقبله لو الدنيا اتشقلبت أكتر من كده ..

سليم: نقول مبروك ...

الحاكم: إيه رأيكم ...؟

المسئولين: [يفكرون، ثم بحركة استعراضية] موافقة ...

الحاكـم: بس ...

سليم: بلاش بسبسة .. معاليك ما تعرفش الخير اللي

ورا المشروع ده ...

الحاكم: إزاى ...؟

سلبم: عمالة جديدة، وتشغيل شركات نظافة، وتغذية،

وملابس .. وحاجات كتير [يُقدم له دوسيهًا أخذه

من "نافع"] اتفضل سيادتك امضى ..

المسئولين: [بعد أن ينظر لهم الحاكم] على بركة الله ...

الحاكم: [يوقع] وأدى إمضتى ..

سليم: وده قرار بإنى صاحب السجن ...

المسئولين: إمضى ياريس .. حقه ..

سليم: وده إقرار بإن نافع مأمور السجن الإستثمارى ..

الحاكم: مين نافع ده ...؟

نافع: [برعشة خفيفة يتقدم] أأ.. أنا يا باشا ..

الحاكم: ما ينفعش .. لازم مأمور السجن يبقى ظابط ...

نافع: ما أنا كنت مسجون يا باشا وعارف المأمور

بيعمل إيه ...

الحاكم: نعم وكمان مسجون .. مش موافق ..

[يُعطى الحاكم ظهره للجميع، يُخرج "سليم "من حقيبته دفتر شيكاته ويوزع على المسئولين الذين يتهافتون عليها، وكل منهم يتلصص على شبيك الأخر ..]

مسئول (1): [ل" مسئول (2)] شيكك بكام ...؟

مسئول (2): وانت بكام ...؟

مسئول (3): دا احنا زی بعض ...

[يضعون الشيكات في جيوبهم، يتجهون ناحية الحاكم ...]

مسئول (1): مش لازم مأمور السجن يكون ظابط ...

مسئول (2): أو نظبطة ونمأمره احنا يا ريس ...

مسئول (3): ومن غير مأمره هو أمير وابن ناس أمرا ..

الحاكم: ما ينفعش .. [يلوحون له بالشيكات، يخطفها منهم .. يتأملها، يهز رأسه بالنفى كما لو أن المبالغ

منهم .. يتاملها ، يهز راسه بالنفى كما لو أن المبالغ المدوّنة بها لا تعجبه ... يُناوله "سليم" شيكًا جديدًا ، ما زال يهز رأسه بالنفى فيناوله كل الشيكات التى معه ...] يعنى انت شايف كده يا سليم بيه ...

سليم: وبعدين ماتنساش حضرتك إن نافع ده طول عمره الراجل بتاع الحكومة ...

الحاكم: بتاع الحكومة ازاى .. والحكومة ذات نفسها كانت حبساه ؟!

سلېم: كان فى مأمورية سعادتك ...

الحاكم: ازاى ...؟!

سلیم: نافع ده أكبر موّرد متظاهرین فی بر مصر ... یاما وقف معانا هو ورجالته، وماتنساش دول بینفذوا

الأوامر عمياني ومابياخدوش غير الفتافيت ... الحاكم: يا سلام ... ده نافع ده كله منافع على كده ...

سليم: جدًّا ... واكتر من كده ...

الحاكم: [ل" نافع "] انت اسمك ياد متسجل عندنا ...؟

نافع: أيوه يا افندم ...

الحاكم: ليك رقم كودى ...؟

نافع: 48 – 56 – 67

الحاكم: [بطفولية] يا راجل ... على كده بقى انت القط الاسود ...

نافع: [وهو يحتضنه] حبيب قلبى، اكشف الغشاوة كمان وكمان يا رب.

سليم: ودلوقتي بقي نشرب نخب الاتفاق ...

الحاكم: [مُشيرًا بيده وكأن بها كأسا] في صحتكم ..

مسئول (2): فين الويسكى ده ...؟!

مسئول (1): إنت ها تعرف أكتر منه ... إشرب وانت ساكت ..

مسئول (2): على رأيك .. [مُشيرًا هو الأخر بيده] في

صحتكم ..

"يشرب الجميع بطريقة استعراضية مبالغ فيها، يخلع "نافع ملابسه الخارجية فيظهر من تحتها ملابس مأمور السجن .. ينظر الجميع له بدهشة ... إظلام تدريجي....]

اللوحة السابعة خريج سجون كبير ومحترم

[میدان عام، معظم اللافتات داخل المیدان تعلن عن السجن الاستثماری، الأتوبیسات والتاکسیات هی الأخری ترفع نفس اللافتات المکتوب علیها عبارات مثل: السجن راحة، استجمام اللافتات المکتوب علیها عبارات مثل: السجن راحة، استجمام / اتسجنوا عندنا ها تنولوا الهنا / یا بخت من ربنا کرمه و دخله السجن / عودة إلی أیام السجن الجمیل / سجن خمس نجوم ونجمة زیادة عشان عیونك / السجن ... تجربة فریدة ذات مذاق خاص، ومن المکن إضافة عبارات أخری کیفما یتراءی، یدخل ثلاثة رجال یرتدون تیشرتات ذات خطوط عرضیة مکتوب علیها کلمات من مثل: حرامی بشرطة / حرامی خریج سجون / حرامی علی ما تُفرج، ...]

الجميع: [يغنون]مين يعادينا ..مين مين، في أراضينا ..مين مين؟!

حرامى (1): كفاية، أنا تعبت ..

حرامي (2): م القتل واللا السرقة واللا ..

حرامی (1): من كلهم .. الواحد عايز يستجم شوية ..

حرامی (3): يبقى مفيش غيره ..

حرامی (2): إيه ..؟

حرامی (3): السجن ..

حرامی (2): برافو علیك .. هوه ده ...[بعشق] السجن

حرامی (3): [وهو یکمل] یعنی استجمام، فسح، أکل وفرفشة، تدلیك، حمایة، أمان، مشاریع جدیدة

حرامي (1): خلاص، يبقى ياللا بينا ..

الجميع: باللابينا ...

[تظهر "إجلال "ولكن كمذيعة هذه المره، ملامحها مختلفة عمّا قبل، ملابسها أنيقة، شعرها طويل ملون، تظهر صورتها على فيديو بروجيكتور في العُمق، تستوقف مُظاهرة الحرامية]

إجلال: أهلاً بيكم في قناة "الوش العكر"، قولولي بقى انتوا عايزين تخشوا السجن ليه ...؟

حرامی (1): حضرتك البلد مابقاش فیها حاجة تتسرق ...

[يظهر "الشحاد" يقف على مقربة منهما، يُشير لـ "إجلال "بينما هي لا تراه]

الشحاذ: أنا عايز أتكلم ... أنا هنا ... أنا بلف وراكى بقالى شهر

حرامي (2): والحاجات اللي فيها الرمق متأمنة جامد ...

حرامی (3): مابقاش قدامنا أى خرّم نفلت منه، قلنا نهدى

أعصابنا ونروق كده لغاية الأحوال ما تتعدل ...

الشحاذ: أرجوكى ... أنا هنا ... بُصى شمال ...

حرامي (1): ولما نخش السجن هانقدر نركز ونفكر ازاى نرجع للسرقة قوتها وكرامتها ...

الشحاذ: شایفانی .. إیدی أهه، ودی دماغی، وده جسمی .. أنا بنی آدم ..

حرامي (2): السجن مليان خُبرا في الإجرام، ودكاترة في علم النهب الدولي، ومستشارين في علم الجريمه بالكوم ...

إجلال: تمام كده ... باشكركم وبالتوفيق ...

[تستمر مسيرة الحرامية، تخرج " إجلال " مرآة من حقيبتها، تعيد إصلاح شعرها، يقفز الشحاذ أمامها، يدبدب الأرض بقدميه، يصرخ، يتشاور، يقوم بأفعال كثيرة، لكنها لا تراه ...]

الشحاذ: أرجوكي شوفيني ... أنا اهه ... ولو قرفانه من شكلي اسمعي صوتي ... على فكرة أنا كنت معاكي في السجن أيام ما كُنتي راجل، بس ... بس أنا كنت متأكد إنك واحدة ست، أصل إيدي لست جسمك بالصدفة واحنا نايمين في ليلة، حسيت لحظتها بسخونة ونعومة لا يمكن تكون على راجل أبدًا، بس انتي نضفتي قوى، بقيتي تلمعي ... [" إجلال " لا تشعر به إطلاقًا] هو أنا للدرجة دي شفاف ... إجلال احنا زمايل قروانة واحدة وماينفعش ننكر بعض احنا زمايل قروانة واحدة وماينفعش ننكر بعض كده يمكن تلاقيني، والله العظيم أنا بني آدم زيكم ...

[إظلام تدريجى، ثم إضاءة لبؤرة جانبية حيث "يوسف وزكى " يجلسان على الرصيف، هيئتهما رثة جدًا ...]

يوسف: هاتفضل ساكت كده..؟ انسى بقى وهوّن على نفسك ..

زكـــي: تخيّل إنى نسيت كل حاجة فى حياتى ومش فاكر غير اللى عملوه فينا

بوسف: الإحساس ده ها يموتك، ولو عملت زيك هاموت أنا كمان ...

زكي: مفيش حد بصلى في الشارع إلا وحسيت إنه عارف حكايتي ..

بوسف: أنا خايف ومكسوف من كُل الناس ...مكسوف من كُل الناس ...مكسوف منك انت كمان، كل نظرة تقصد أو ماتقصدش باحس إنها بتعرّيني ...

(كسي: بالشكل ده يبقى الموت أحسن ... وأهو هناك نشوف العدل اللي مش قادرين نشوفه هنا ...

[ينهمر الإثنان في حالة من الضحك الساخر الذي يتحول في نهايته إلى حشرجة بكاء ... مؤثر صوتى يتبعه تغيّر في الإضاءة، تدخل "نشوى" وهي تقود مظاهرة متطالبة بالحرية، بينما تدخل مجموعة الحرامية من الجانب الآخر ...]

نشوى: [تهتف] الحرية هيه الناس ... هيه الدم والإحساس ...

[الجميع يرددون وراءها ...]

حرامي (1): [يهتف] السجن السجن يا إما بلاش ... غيره والله مانرضاش ...

[تتواجه المجموعتان ...]

منظاهر(1): سجن إيه اللى بتنادوا بيه ده ... ؟! حد يعمل فى نفسه كده ... ؟!

حرامي (2): شكلهم مايعرفوش حلاوة وطعامة السجن الجديد ... سيبهم على عماهم

منظاهر(2): [بسخرية] حلاوة وطعامة حتة واحدة ... شكلكوا اتهبلتوا ...

نشوى: مالكوش دعوة بيهم، ماحدش يكلمهم ...

حرامی (3): طب اسمعونا الأول وبعدین احکموا، مش هاتخسر و احاحة ...

[إضاءة متغيرة، يختلط الفريقان، هرج ومرج يسود المكان، تنطلق مجموعات متدافعة من الأصوات للفريقين، نسمعها ولا نتبين من الذي يقولها بالتحديد ...]

الأصوات :

- (**للفريقين**) السجن ده متعة ...
- ماينفعش نسيب الحرية ونشترى السجن ...
 - عاجبك العيشة اللي احنا عايشينها دي ...؟
- الحرية هيه الناس .. هيه الدم والإحساس ..
 - طُطُ كبيرة جدًا ...
 - يحيا السجن ... ده بقى ولا بورتو مارينا و نعمها ...
- أكل ونوم وقلة صنعه ..لا شغله ولا مشغله ..
 - عيش بقى ..
 - الشوارع هيه اللي بقت سجن ..
 - ماتجربوا مش هاتخسروا حاجة ...
 - عايز الحرية وسط أهلى ...
 - أهلك معاك في السجن …
- هـمه عاوزين البلد سجن، خلاص بلدهم وهمه أحرار فدها ..
- المهم نعيش .. سجن واللا شارع مش فارقة ...
 - يعنى نعمل إيه ... أنا دُخت ...
 - يعنى اهتفوا معانا ..

- السجن السجن يا إما بلاش ...

نشوى: [L" إجلال"] من فضلك أنا مُضربة عن الطعام والكلام لغاية ما تتحقق مطالبنا فى الحرية .. [تهتف] الحرية يا إما بلاش ... الحرية هيه الناس .. [لا تجد من يهتف وراءها غير واحد فقط، ويردد الهتاف خطأ، تنظر للجميع، تخاطبهم] مالكم، ساكتين ليه ...؟

منظاهر(1): أصل احنا غيرنا رأينا .. بيتهيألى السجن ها يبقى مناسب لظروفنا ...

نشوى: لأ اوعوا تقولوا كده ... السجن لو جنة برضه

منظاهر(3): [يهتف] السجن السجن يا إما بلاش ...

[الجميع من الفريقين يُرددون وراءه، ثم يخرجون بهتافاتهم، فقط تبقى "نشوى " ورجل واحد مع " إجلال "، تنظر إليها " إجلال " في تعالٍ، ثم تتركهما وتتجه للخروج، يُقابلها " يوسف وزكى "فتتوقف ..]

بوسف: لیه عملتی کده ...؟

إجالان: [بانفعال مكتوم] يوسف .. انت كمان ها تلوم عليًا ... أنا زهقت، ماحدش ليه دعوة بيًا ... اللى شايف نفسه أحسن منى مايعرفنيش [بتأثر] مش لازم الناس كلها تبقى أبطال ... أنا ... أنا ما قدرتش [بتحد يُظهرها كما لو كانت تقصد عكس المعنى] وبرضه مش ندمانة ... لو رجعوا وخيرونى تانى بين السجن والقرف اللى كُنّا فيه وبين دلوقتى أكيد ها اختار ... ها اختار اللى أنا فيه دلوقتى ..

[تخرج " إجلال " يتقدم " يوسف وزكى " من " نشوى "، يمدان أيديهما لها ...]

يوسف: إحنا معاكى ...

نشوى: لأخر الطريق ...

زكى الأخر الدنيا ...

[حركة إضاءة متغيرة، يظهر "الشيخ جابر" وهو يقود مظاهرة لمجموعة من الشباب المُلتحى]

الشيخ جابر: [يهتف] إسلامية إسلامية .. لا شرقية ولاغربية ..

[الجميع يرددون وراءه، تمر المظاهرة ...]

بوسف: فيه إيه ... مش ده الشيخ جابر ... ؟

زكــــى: أيوه يا سيدى ... عمل حزب وعايز نصيبه من

التورته ...

بوسف: هيه خلاص بقت تورته...؟

نشوى: بس للأسف مالناش فيها ... خلينا في المهم،

نتقابل بكرة ...؟

بوسف: نتقابل بكره ...

[يتركها" يوسف وزكى"، تهم" نشوى " بالخروج هى الأخرى، فيُقابِلها" سليم" داخلاً ويستوقفها ...]

سلیم: نشوی ..

نشوى: مبسوط من اللي بيحصل في البلد ...؟

سلبم: البلدزي الفل، وما حدش بيشتكي، إنتي بس

اللي حساسة ومزرجنة حبتين ...

نشوى: يعنى إيه مزرجنة ... البلد كلها بقت سجن ..

سليم: حد اشتكى ...؟

نشوى: الناس خايفة ومرعوبة منكم ...

سلبم: [مقتربًا منها] هوه ... هوه احنا بنخوف ...؟

نشوى: من فضلك ما تلمسنيش ..

سليم: على فكرة بقى، إنتى عاجبانى جدا، متنحررة

كده ونرفوزة، وعاملة زي المُهرة الشاردة، نوع جديد ..

إيه رأيك ...؟

نشوى: في إيه ..؟

سليم: نتجوز ...

نشوی: إنت بتهزر ...

سلبم: ليه، مش مالي عينك .. فيًا حاجة غلط ...؟

نشوى: كلك غلط ...

سلبم: ما تخلنيش أزعل منك بقى ... أنا باطلب منك بالذوق والحنية، والكلام ده، ماتخلنيش استعمل وسائل تانية

نشوى: إعمل اللي انت عاوز تعمله [تهم بالخروج، يستوقفها]

سلبم: مش ها أقدر، تعرفى ليه ..؟ بيتهيألى كده ...حبيتك .. أيوه حبيتك .

نشوى: مش بقولك إنت بتهزر .. القلب اللي يعرف الطمع، والظلم، والكره .. عمره ما يعرف الحب ..

سليم: علميني .. هتلاقيني عجينة طرية في إيديكي ..

نشوى: ما عنديش وقت للى زيك ..

سليم: جربى .. يمكن أتغير ..

نشوى: تتغيّر ... ؟! يا سليم بيه احنا طريقنا مش واحد،

وعمره ما هايبقى واحد [تهم ثانية بالخروج ...]

سليم: [صارحًا] نشوى .. خلى بالك إنتى اللى اخترتى، ولازم تعرفى إنى لما أعوزك هاقدر أجيبك لغاية أوضة نومى ..

[يتناظران بشدة، ثم تستدير "نشوى "لتنصرف، تاركة إياه بمفرده، يظهر صوته دون أن يتكلم ..]

صوت سليم: [يتكلم ويرد على نفسه] مغرورة ... [بتون صوت أخر] ويمكن إنت اللى مغرور .. [بالصوت الأول] أنا أقدر أخليها تبوس رجليًا [بالثانى] تقدر بس غصب عنها مش برضاها [بالأول] ما هو اللى ها يجننى رضاها ده [بالثانى] لازم تعترف لنفسك إنك حبيتها بجد، ويمكن كمان من قبل ما تشوفها، هيه أول واحدة قالت لأ لدنيتك، الدنيا المتزوّقة اللى

كل الناس فيها مترميين تحت رجليك [بالأول] وهيه كمان لازم تبقى زيهم تحت رجليا [بالثانى] إنت حبيتها، إنت الأضعف، ما ينفعش [بالأول] لأ، أنا ما حبتهاش،أنا عمرى ما حبيت ... سليم المنزلاوى ما يحبش ولا يضعف أبدًا ... أنا مش محتاج أحب ... أنا لما أعوز حاجه لازم الدنيا كلها تجرى ورا بعضيها وتنفذ اللى أعوزه ..

[تتصاعد صرخات مجنونة لا سليم "بالصوت الأول والثانى، وكأنها تتحاور صارخة، يدور حول نفسه، تُحاصره بقعة ضوئية بينما يظلم بقية الفضاء المسرحى، تُضاء عدّة بؤر متلاحقه، يتخيل "نشوى " بداخلها وهى تُطلق ضحكات هيستيرية، كما نسمع بعض المقاطع الحوارية السابقة لها ... يُطاردها " سليم " فلا يستطيع الإمساك بها، يضع يديه على أذنيه، يُقاوم دوارًا، يسقط، تصمت كل الأصوات، تنظفئ بؤر الإضاءة...]

اللوحة الثامنة حضرتك حرامى؟ ... إتفضل ..

"سليم" يقف على باب السجن الاستثمارى، أمامه طابور طويل من المساجين، كل منهم يحمل معه أوراقه، "سليم" يتفحصها، على بوابة السجن توجد لافتة كُتب عليها: السجن حق لكل مواطن ... يظهر" الشحاذ" من بين المساجين، يتُحاول الدخول متسلسلاً ...]

سليم: [L"مسجون (1)"] قلت لى بقى تهمتك إيه ..؟ الشحاذ: أنا ماليش تهمة محددة، وبعدين اللى تشوفه حضرتك مش هانختلف .

[لا أحد يسمعه أو يراه ...]

مسجون (1): [بافتخار] نصب ... تلت تربع مليار جنيه

الشحاذ: أرجوك أنا واقف فى الطابور من قبليه .. دخلنى السجن الأول ..

سلبم: [ك"مسجون (1)"] كويس .. خُشُ [لأخر] وحضرتك ...؟

مسجون (2): اختلاس ..

الشحاذ: هوه أنا مش باين خالص كده ..؟ طب والله لا داخل منى لنفسى كده ..

[يدخل " الشحاذ " إلى السجن فلا يجد من يمنعه ...]

سلبم: [مواصلاً حديثة مع "مسجون (2) " ...] برافو .. كام ...؟

مسجون (2): سبعمية وخمسين جنيه ...

سلبم: كويس .. كوى .. [منتبهًا] إيه ...؟ كام ...؟!!

مسجون (2): سبعمية وخمسين جنيه .. كنت عاوز أدفع فلوس الجمعيه ..

سليم: [مغتاظًا] إنت ما تستاهلش .. حيوان .. السجن خسارة فيك

مسجون (2): طب أعمل إيه ...؟

سلبم: روح على سجن الحكومة يا حمار ... ناس ما عندهاش دم

[یخرج "مسجون (2) "مُسرعًا، یشیر له "ملیجی "الذی یقف فی خجل ...]خلصنا، وإنت ...؟

مليجي: لأ .. أنا ها أروح سجن الحكومة احسن ..

سليم: ليه، إنت عملت إيه ...؟

ملبجي: سرقت رغيف فينو، أصلى كنت جعان ونفسى

هفتنی علیه ...

سليم: [مُنفعلاً] فين مسدسى، ها أطخ أمه دلوقتى ..

مليجي: [وهو يجرى خارجًا] أعمل إيه يعنى، جعان والبلد

مافيهاش ولالقمة

سليم: حاجة تنرفز .. وإنت ..؟

مسجون (3): حضرتك تعرف سعيد بيه أبو السعد ...

سليم: بتاع السلاح ...

مسجون (3): باعت لحضرتك الكارت ده وبيوصيك عليًا ...

سليم: بسكده .. اتفضل السجن تحت أمرك [يفسح

له مكانا للدخول، يدخل "مسجون (3)"، ينادى ا

نافع "] نافع ...

نافع: [داخلاً] أمرك يا سليم بيه ...

سليم: تعال كمل إنت، والوسايط الكبيره تدخلها

على طول ..

نافع: حاضر..

[يتجه "سليم "للخروج، يلمح "نشوى "فى نهاية طابور المساجين، يتوقف عندها مندهشًا ..]

سلیم: نشوی ..!!

نشوى: مستغرب ليه .. طول ما إنت سجان وأنا لسه قادرة أقول لأ، يبقى هنتقابل ...

سليم: تهمتك إيه ...؟

نشوى: ما أنا لسه قابله ...

سلبم: لأه إيه وكلام فارغ إيه ...؟ الناس بتجيب لى وسايط عشان أوافق على دخولها السجن ...

نشوى: مش كل الناس زى بعضها ..

سليم: [صارخا في الناس] إنتم .. فيه حد فيكم مش عايز يخش السجن .. انطقوا ما تبصوش وتسكتوا

كده .. بقولكوا انطقوا ..

نشوى: فيهم اللي عايز، واللي خايف واللي مكسل يتكلم، واللي ... واللي ...

سليم: طب وانتى عايزة واللا مش عايزة ...؟

نشوى: أعتقد إنك عارف إجابتي ..

سليم: طب اتفضلي بره ... بره [تهم بالخروج] إستني ..

[تستدیر له] فکرتی فی اللی اتکلمنا فیه [تستدیر عنه لتخرج، یصرخ فیها] بقولك استنی، کلمینی زی ما باکلمك ..

نشوى: تبقى غبى لولسه ما تعرفش ردى ...

سليم: [يصفعها بشدة] إخرسى ...

[تنظر له ساخرة بوجه جامد، وما إن يضربها حتى تنفجر في الضحك، ثم تتركه وتخرج، يزداد غيظه ..]

سليم: [للمساجين] لما سألتكوا خرستوا وما اتكلمتوش ليه ..؟ إنتوا ما تستحقوش السجن [يضربهم صارخًا] نافع

نافع: أوامرك يا سليم بيه ...

سلبم: عذبوهم كلهم، وبعدين ارموهم في سجن الحكومة... [صارخا فيهم] يا كلاب ...

نافع: هدى نفسك يا سليم بيه، أنا ها أعمل اللازم ..

[يخرج "سليم "، يرفع "نافع "كُرباجًا ويضرب المساجين وهم لا يبدون أية مقاومة، ثم يسوقهم أمامه كقطيع ..]

نافع: قُدُّامى على سجن الحكومة [مُقلدًا "سليم"] با كلاب ...

[يتجمد المشهد، المساجين أمام "نافع "، روسهم محنية، وأياديهم خلف ظهورهم، بينما "نافع "يقف منتصبًا رافعًا كرباجه لأعلى ... إظلام تدريجي ...]

اللوحة التاسعة اضربوا دماغكوا في الحيط .

[ساحة سجن الحكومة، مجموعة من المساجين يتظاهرون وهم يحملون اللافتات المندده بسجن الحكومة، المأمور ومجموعة العساكر لا يستطيعون السيطرة على الموقف ...]

مليجي: [يهتف] مش ها نخبى ولا هندارى .. يحيا السجن الاستثماري ...

[يردد المساجين وراء " مليجى " بينما المأمور يتحدث فى الموبايل ...]

المأمور: مش عارف أعمل حاجة يا ريس ... ها يكسروا السجن .. إيه .. أموّت واحد واللا اتنين الباقيين يخافوا

سعادتك قتلنا لغاية دلوقتى ييجى عشرين مسجون، وبرضه مافيش فايدة .. خايف يخرجوا بالمظاهرة للشارع .. شارع إيه يا ريس، دا احنا فتحنا البوابات الناس اللى بره هيه اللى دخلت.. جربنا نجوعهم، بقوا يخرجوا يجيبوا أكل ويرجعوا تانى .. أنا والعساكر بنفكر نهرب ونسيب لهم السجن .. أوامر سعادتك .. حاضر ..

[تزداد أصوات المظاهرة، المساجين يرفعون " مليجى " على أكتافهم ..]

مليجي: اللى بيحصل معانا دا ظلم، إحنا موجودين فى السجن بمجهودنا ... إحنا مواطنين شرفاء ودا حقنا، نعملهم إيه أكتر م اللى عملناه عشان يودونا السجن

الاستثماري ...؟ نقتل ...؟!

المساجين: أعوذ بالله ..

مليجي: نختلس ...؟

المساجين: البلدما بقاش فيها ولا مليم، ها نختلس إيه يا حسرة ...؟

مليجي: نسرق ...؟

المساجين: إيش ياخد الريح من البلاط ...

المأمور: [متدخلاً] اسمع يا مسجون منك ليه ...

مليجي: [مُقاطعًا] مش ها نقبل أي تفاوض .. آخر كلام

عندنا نروح السجن الاستثماري ..

المأمور: وإذا ما كانش القرار ده في إيديا ...؟

مليجي: يبقى سيبنا بقى نكمل مظاهرتنا، يمكن اللى

في إيده القرار يسمعنا ..

المأمور: طب اتظاهروا في الشارع عشان اللي في إيده

القرار يسمعكم ...

مسجون (1): هوه عاد فيه ناس في الشارع ...؟

مسجون (2): واللاحتى رغيف عيش واحد .. الناس اللي لسه بره بتاكل في نفسها ..

مليجى: ولغاية ما مطالبنا تتنفذ احنا مضربين عن

المأمور: [مقاطعًا بفرح] عن الطعام مش كده ...؟!

مليجي: لأيا حدق .. مضربين عن السكات، ها نفضل كده

نعمل مظاهرات لغاية ما حد يسأل فينا ..

المأمور: طب اعرضوا مطالبكم ...

مليجي: أول مطالبنا ننتقل كلنا للسجن الاستثماري ..

المأمور: والتاني ...؟

ملبجي: يُخصص لكل واحد مننا زنزانه بحريه مستقله ...

المأمور: والتالت ...؟

مليجى: تبعتوا تجيبوا أهالينا يتسجنوا معانا ...

المأمور: طب واللي منهم شعال ...؟

مليجى: يبقى يروح شغله ويرجع أخر النهار يتسجن ...

المأمور: دا مش كلام، ودى مش مطالب، وأنا مش ها أقدر

أنفذها، اضربوا دماغكوا في الحيط ...

مليجي: كده .. طب ياللا بينا .. [يهتف] يسقط سجن الحكومة، ويحيا السجن الاستثماري ...

[الجميع يُرددون وراءه، يدورون داخل المكان، المأمور يتلقى اتصالاً]

المأمور: أيوه يا ريس .. برضه مش سلكان فيهم ... هه .. بس دا واد مشاغب جدًا .. حاضر ها ريس [يغلق تليفونه، يشير لليجي، يناديه] اسمع ...

مليجى: عايز إيه ...؟

المأمور: عايزك في كلمتين ..

مليجي: قول قدام الناس، مافيش حاجة بنخبيها على بعض ..

المأمور: أصله سر ... [متوسلاً] عشان خاطرى ...

[يترك "مليجى "زملاءه، يتجه للمأمور، ينتحيان جانبًا، تركز عليهما بؤرة ضوئية بينما يظلم باقى الفضاء المسرحى ..]

مليجى: فيه إيه ...؟

المأمور: إنت أهلك كام واحد ...؟

مليجى: [يحسبهم على أصابعه] تلتاشر ...

المأمور: ها نسجنهم كلهم ...

مليجى: [هاتفًا] يحيا العدل ..

[إضاءة مفاجئة على المساجين يقفون كتلة واحدة وهم يرفعون أذانهم لأعلى ...]

المساجين: فيه إيه .. ؟

[يُظلم الفضاء المسرحي، تعود البؤرة ...]

المأمور: وها نحطكوا كلكوا في زنزانة مفتخره في السجن الاستثماري ...

مليجى: أهو كده .. يحيا العدل ..

المساجين: [إضاءة مرةً أخرى] فيه إيه ...؟

مليجي: والمساجين زمايلي ..؟

المأمور: إنت ها تحبهم أكتر من نفسك، سيبهم بقى

لصيرهم ...

ملبجى: وإيش ضمَّنى إن ده ها يحصل ...؟

المأمور: رقبتى ... وبعدين مش ها تخسر حاجة .. جرب ...

مليجي: [يُعدد على أصابع يده الخمسة] أبيعهم، ما

أبيعهمش [يصل في النهاية إلى أبيعهم ، يكرر بنفس الطريقة فيصل إلى نفس النتيجة ..] خلاص بقي،

الفال بيقول أبيعهم مرتين، هممه ونصيبهم بقى ..

المساجين: [إضاءة مرة أخرى] هوه فيه إيه ... ؟

مليجي: إخواني ...

المساجين: إيه ...

مليجي: عاوزينى أبيعكوا ... بيساومونى يدخلوا أهلى السجن الاستثماري ...

الساجين: وها تعمل إيه ... ها تبيعنا ...؟

مليجي: هـمُه مش عارفين حاجة مهمة جدًا ... وهيه إنى ماليش أهل غيركم.

المساجين: هييييييييييه ...

[يحمل المساجين " مليجى " ويدورون به في ابتهاج واضح بينما يطأطئ المأمور رأسه في ضيق ..]

اللوحة العاشرة بـرّه السجن مسئولين وحرامية

[الفضاء المسرحي مجهز بحيث يصلح كمكان للاجتماعات، ففي العُمق يوجد مجموعة من الأعلام، وأمامها نصبت ميكروفونات عديدة، كما يوجد العديد من الأماكن الخاصة بالحلوس منتشرة بحيث تغطى مساحة خشية المسرح، على كل مكان من هذه الأماكن، وضعت لافتة تُحدد من سيحلس داخله... تبدأ الإضاءة تدريحيًا لنجد "نشوى " تجلس في مكان الصحافة ومن خلفها يجلس يوسف وزكى، "بينما يجلس "سليم" في مكان رجال الأعمال .. أما " المأمور، نافع، شكري " فيجلسون تحت لافتة السلطة التنفيذية، وهناك إثنين من المسئولين تحت لافتتهم، الحرامية الثلاثة يتحلقون في دائرة ويلعبون لعبة " مك واللا كتابة "، وعلى مقربة منهما " إجلال " وهي تُعدل من هندامها بالنظر في مرآة صغيرة، "، يزداد سطوع الإضاءة بمجرد سماع الموسيقي ويحدث توتر عام، تلتقط" إجلال " المكروفون، تتحدث ...]

إجلال: طلعناع الهوا .. أوكى أنا جاهزة [تتحدث] دائمًا كعادته يصنع من كل أيامه أحداثًا تاريخية، وها هو الموسيقى] وصل سيادته الأن [يقف الجميع، بينما نسمع أصوات تصفيق كثيرة مسجلة يدخل الحاكم ملوحًا في عظمة ...]

شكرى: [للمأمور] احنا ما بنصقفش ليه ...؟!

المأمور: ما همم مسجلين تصقيفنا من المؤتمر اللي فات ...

[الحاكم يقف أمام الميكروفونات، ينقر عليها بيده، يُصدر أصواتً ليُجربها بتنويعات صوتية مختلفة، تعود بعدها أصوات التصفيق، يُشير بيده للحضور ..]

الحاكم: شكرًا .. حوشوا التصقيف للآخر .. ودلوقتى [يفرد مجموعة من الأوراق أمامه] أيها .. أيها .. [ينظر فى الأوراق] أه .. اسمه الشعب، أيها الشعب [يجرى المأمور ليعدل من وضع يافطة الشعب والتى لا يجلس تحتها أحد، يلاحظ الحاكم ذلك] إيه ده ..؟

فين الشعب ...؟

المأمور: في السجن يا افندم ..

الحاكم: والصحافة ...؟

نشوى: [تقف "نشوى"] ما بقاش منهم إلا أنا ..

الحاكم: والجيش والشرطة ...؟

المأمور: كلهم بيحرسوا السجون يا افندم، وأنا والظابط

موجودين بالنيابة عنهم

الحاكم: ورجال الأعمال ...؟

سليم: تحت أمر معاليك ..

الحاكم: برضه ما بقاش منهم إلا إنت ...؟ طب

والمستولين ...؟!!

مسئول (1): أفندم ...

الحاكم: طب مين المخططين دول ...؟ [يُشير للحرامية

الذين يرتدون ملابس مخططة كعادتهم ...]

حرامی (1): احنا الحرامیة یا افندم ..

الحاكم: إشمعنى انتوا كتير كده ...؟

حرامی (2): ربنا یزید ویبارك یا افندم ...

الحاكم: طب لما أحب أخطب وأفقعلي صوتين أتكلم مع مين ...؟

سليم: معانا يا افندم .. ما هو احنا برضه أساسنا من

الشعب، ويجوز الكلام معانا ...

الحاكم: يعنى أخطب واللا أعمل إيه ...؟

سليم: لازم تخطب يا افندم، احنا موجودين وسامعين ..

الحاكم: إنتوا مش مهم، ما انتوا عارفين اللى انا بقوله، أنا كنت بس بستسمحكم يعنى لو تجيبولى إنشاله مواطن واحد من الشعب أقوله الكلمتين، عشان يعنى الخطبة تبقى شرعية ..

نشوى: أنا من الشعب ..

بوسف: وانا من الشعب

زكى: وانا كمان

الحاكم: [فرحًا كطفل] والله .. بجد .. الحمد لله، لسه عندى شعب .. وانتوا ليه بقى مش محبوسين زيهم ...؟

. نشوى: اسال سليم بيه والمأمور بتاعه ..

المأمور: [هامسًا لـ شكرى] تقصدنى أنا بالمأمور بتاعه واللا تقصد نافع ..؟

الحاكم: [ل"سليم"] ليه يا سليم بيه ..؟

سليم: يا افندم البلد فيها ديمقراطيه، حضرتك عاوز الرأى العام العالمي يقولوا إننا حبسنا الشعب كله، لازم يكون فيه توازن ..

نشوى: الموضوع مش كده خالص، الموضوع إن سليم بيه حاجزنى لنفسه، مختار لى سجن خاص هوه يعرفه كويس ..

الحاكم: دا غير السجن الاستثماري بتاعك يا سليم بيه ...؟

سليم: أصل الموضوع ...

الحاكم: [مُنفعلاً] بلا موضوع بلا زفت .. دا تهريج، بلد من

غير شعب ما تبقاش بلد، تبقى أى حاجة تانية [يرمى بالأوراق من يده] شوفولكوا حل وإلا بشرفى

ها أسجنكوا كلكوا إنتوا كمان [لحظات صمت،

نظرات متبادلة بين الجميع، الحاكم يتمشى في

عنفوان، ثم يقف بشموخ أمام المأمور، ثم بتوسل

كبير يظهر كطفل يبكى ..] أرجوك هات لى شعب،

أنا عايز شعب [يُدبدب على الأرض بقدميه وهو

يردد الجملة الأخيرة ...]

المأمور: [كطفل هو الآخر يُدبدب على الأرض ويبكى ...] وأنا

مالى بقى، أنا ما عرفتش إن الشعب كله اتسجن إلا

لما رحنا نشترى أكل ما لقيناش حد في الشارع ..

الحاكم: وعملت إيه ...؟!

المأمور: خدت ولادى وأمهم ورحنا قعدنا في استراحة

السجن بتاعتي ..

الحاكم: مش قصدى .. أنا قصدى عملت إيه لما ما لقيتش

شعب ...؟

المأمور: فتحنا لهم الأبواب ما خرجوش، شتمناهم وهزأنا هم برضه ما خرجوش، كلنا أكلهم وبرضه ما فيش فانده ..

الحاكم: يعنى أنا باحكم مين دلوقتى ...؟

سليم: [متدخلا] سابقًا الشعب، حاليًا مفيش حد ...

الحاكم: ليه ... هم المساجين دول مش شعبي ...؟

سليم: بيتهيألى لأ ...المساجين اللى بيحكمهم مدير السجون، اللى هوه أنا .. [ينضم إلى جانبه المأمور موافقًا على ما يقول ..]

الحاكم: يعنى إيه الكلام ده ... وأنا ...؟!!

سلبم: فیه قرار علی وشك الصدور بتخریط سیادتك للوز ... الوز ... الوز ... الوز ... الوز ... انا ما عینتکش ... انا ما أقبلش .. أنا ما عینتکش ... أنا ما أعرفکش [یجری للمیکروفونات، یتحدث فیها] قرار ... قرار جمهوری رقم ... مش مهم .. قررنا نحن حاکم

.. قرار جمهورى رقم ... مش مهم .. قررنا نحن حاكم البلاد بالإعلان عن طلب عدد واحد مدير للسجون، بالإضافة لطاقم الحراسة الخاصة بيه، على أن يشترط فيه، واحد: أن يكون قد قضى مدة تتراوح بين تلاتين وخمسة وتلاتين سنة فى حكم البلاد .. إتنين : أن يكون طوله هو

شخصيًا]، ولون بشرته [يذكرها أيضًا]، وأن يكون اسمه على اسمى وأمه اسمها بهانة برعى الدكر على اسم أمى، وثالثًا وده الأهم: أوافق عليه أنا شخصيًا .. رابعًا: يُنشر الخبر فى الجرائد الرسمية، ها تقولولى مفيش جرائد .. مش مهم، أديكوا عرفتوا ...

سليم: لأ .. الكلام ده في المشمش ..

الحاكم: [ساخرًا] طب ما احنا في أوان المشمش دلوقتي يا ظريف ..

سليم: إنسى .. دلوقتى الحاكم الفعلى للبلاد أنا، واللى مش عاجبه الكلام ده يورينى عرض كتافه .. السجن الخاص تبعى والـ

الحاكم: [مُقاطعًا] والسجن العام تبعى أنا ..

سليم: دا كان زمان .. دلوقتى كلهم بقوا تبعى ..

الحاكم: [للمأمور وشكرى] إنتوا ساكتين ليه ...؟ اتصرفوا ..

المأمور: حاضر .. ها نتصرف ..

[ينضم المأمور والضابط، ومجموعة المسئولين والحرامية الى "سليم"، بينما توجد "نشوى" في مكانها ... كلهم يشهرون الأسلحة في وجه الحاكم ...]

الحاكم: بس ... بس ... دا أنا با آخد وأدى معاكوا .. سليم باشا لم الناس دى، احنا مهما كان برضه بتوع بعض، وأكيد ها يبقى فيه مشاريع كتيرة بينًا، ومتنساش إن ليًا علاقات كتيرة بكل الدول الخارجية اللى إنت غصب عنك ها تحتاجها ..

[يُشير "سليم" للجميع بأن يخفضوا أسلحتهم فينفذوا ...]

سلم: طلباتك ..

الحاكم: ما دام الموضوع كده، يبقى نتفق ..

نشوى: [تنهض من مكانها ...] لحظة واحدة .. الاتفاقات اللى من النوع ده أنا ما يشرفنيش أحضرها .. [تخرج، يتُشير "سليم" لـ "نافع"، فيخرج وراءها، يرتكن" يوسف وزكى "إلى أحد الجوانب ...] ...

سليم: كنا بنقول ها نتفق .. اتفضل ..

الحاكم: خرايط الموارد الطبيعية .. البترول، المعادن، المنح الخاكم: ده تحت إيدى .. الخارجية، العلاقات بكل الدول .. كل ده تحت إيدى ..

سليم: والشعب كله تحت إيدى أنا ..

الحاكم: [يصنع من يديه كفتى ميزان ويحركهما صعودًا وهبوطًا ...] الكفتين مش متساويتين، هارد لك، أنا اللى أكسب ..

[يتجه الجميع ليقفوا بجوار" الحاكم"، يبقى "سليم" بمفرده ...]

سلبم: كلكوا خونه .. بس اللى انتوا مش فاهمينه إن فلوس البلد كلها معايا أنا، أملاك الناس كلها فى إيدى، المصانع، الشركات، البيوت، والسجن، وكل كل حاجة ..

[يترك الجميع " الحاكم "، ويتجهون ليقفوا بجوار " سليم "، تتعالى ضحكات الحاكم الساخرة ...]

الحاكم: الأسلحة ومصادر التمويل معايا أنا [يتجهون إليه مرةً أخرى ..]

سلبم: الأكل واللبس والأدوية عندى [يعودون إليه ... وهكذا في كل مرة ..]

الحاكم: الجيش عندى ...

سليم: الشرطة عندى ...

الحاكم: الخطط السرية ومخابىء البلد عندى ..

سليم: الأهم من ده كله الشعب، وده بقى عندى أنا ..

الحاكم: [تزداد ضحكاته الساخرة] تفتكر لو خيرنا

الشعب بتاعك ده ها يختار يكون مع مين ...؟

سليم: هه .. أكيد معايا ..

الحاكم: أشك .. وليه ما يختارش يكون معايا أنا ...؟

سليم: أكيد ها يختار يكون معايا، أنا اللي ...

الحاكم: إنت اللي إيه ...؟ قولها بصراحة .. إنت اللي

ساجنه ..

سليم: وإنت اللي ماصص دمه وكاتم على نفسه ...

شکری: معنی کده إنه مش ها يختار حد فيكم ...

المأمور: طبليه ما يختارنيش أنا ...؟

مسئول (1): وممكن جدًا يختارني أنا ...

حرامی (1): ولیه مش أنا ...؟

مسئول (2): ويمكن أنا ...

حرامى (2): لأ أنا ...

حرامى (3): أو أنا ...

[يدور الجميع حول بعضهم كالمخمورين بنشوة السلطة، تتصاعد كلمة "أنا "لتشكل انفجارًا صوتيًا، ثم يهم الجميع بالدخول في

معركة .. إظلام تدريجي بينما تتعالى أصوات العراك .. تضاء بؤرة صغيرة، يظهر بها "يوسف وزكى"]

زكى: هيه بقت كده ..؟

بوسف: شكلها كده من زمان واحنا اللي مش واخدين بالنا ..

زكى: [ساخرًا] زى ما نكون اتولدنا عشان نتفرج ...

بوسف: [متسائلا] بقولك إيه ...هيه موته واللا أكتر ..؟

زكى: قصدك إيه ..؟

بوسف: الناس دى بتموتنا ف اليوم ييجى عشرين مره واحنا

بنتفرج على موتنا ونضحك ... ما دام كده كده ميتين يبقى نختار بقى الموته اللى تناسبنا

زكى: برضه قصدك إيه

پوسف: إيه اللي بيخلي بني أدم بيقدر ياخد قرار وبيقدر

يرفض وبيقدر يقف على رجليه حتى لو كسروهاله،

وبنى آدم تانى يعيش طول عمره خايف ...

ز**كى:** مش عارف ...

پوسف: أنا كمان مش عارف، بس حاسس جوايا دلوقتى

بقوة غريبه، روح جديدة مش قادر أفسرها، حاسس زى ماتكون فيه كامير ابتصورنى وكل الناس اللى أعرفهم بيشوفوني، عشان كده لو هيموتوني لازم أموت وأنا واقف فارد طولي حتى لوضهري مكسور ..

[إظلام تدريجي، ثم تكشف بؤرة ضوئية أخرى عن "نافع " وهو يعترض طريق "نشوى "..]

نشوى: [بانفعال] عايز إيه منى ...وسع من طريقى، سيبنى أخرج ..

نافع: أسف ..ما عنديش أوامر إنك تخرجي ..

نشوى: يعنى إيه، ها تحبسني هنا ...؟

نافع: لأ ...حضرتك هاتيجى معايا [يحاول اقتيادها بالقوة، تقاومه صارخة] بلاش معاندة [يضربها] مش عايز أأذيكى ..

[تقع فاقدة للوعى، يحملها "نافع "ويخرج .. إظلام تدريجى ...]

اللوحة الحادية عشرة أقدر أجيبك لغاية أوضة نومى

[حجرة نوم "سليم" ... السرير يظهر في المنتصف، توجد مجموعة ملونة من قمصان النوم معلقة بجواره، "نشوى "منزوية في أحد الأركان وهي تبكي، ملابسها ممزقة، توجد آثار تعذيب كثيرة على وجهها ويديها، وبمجرد أن تسمع صوت باب الحجرة وهو يفتح تنزوى أكثر في الركن، يدخل "سليم"، ينظر لها بانتصار ..]

سلبم: شفتى بقى إنى أقدر أجيبك لغاية أوضة نومى

[يتحسس قمصان النوم فى اشتهاء، ثم ينفجر فى
الضحك] مالك ما بترديش عليًا ليه ..؟ [يسمع بكاءها]

إيه ده ...؟ إنتى بتعيطى ...؟ [يذهب إليها، يتفحصها،
يصرخ] الحمار، الحيوان، أنا ما قلتلوش يعمل معاكى
كده .. أنا ...

نشوى: [تتمالك نفسها] أمال إنت قلتله يعمل معايا إيه يا سليم بيه ...؟

سليم: قلتله .. أنا ..

نشوى: إنت إيه ...؟ الكلام بقى يهرب منك دلوقتى ..

سليم: صدقيني أنا ما أعرفش إنه ها يعمل كده ..

نشوى: معادتش تفرق، تعرف أو ما تعرفش ... أنا فهمت من اللي جابونى لغاية أوضة نومك .. اسفة .. لغاية أوضة نوم حضرتك إنك عايزنى [تفتح أزرار بلوزتها] وأنا أهه تحت أمرك من غير ضرب ولا بهدله، اتفضل، أنا جاهزة

["سليم" يقف مُتجمدًا ناظرًا إليها بدهشة] واعذرنى إذا كنت مش متزوقة لحضرتك عشان تنبسط أكتر، أصلهم ما ادونيش فرصة .. اتفضل ... [تقاوم بكاءً مكتومًا ...]

سليم: نشوى من فضلك، أنا كان قصدى أقول لك إنى أقدر أنا وانتى ...

نشوى: [تقاطعه] دا مش وقت كلام .. واللا المكان ده مكان كلام، بقولك أنا جاهزة .. إنت مش مجرجرنى لغاية هنا عشان كده ...اتفضل .. سلبم: نشوى .. أنا ...أنا أسف .. أنا كنت ..

نشوى: [مقاطعة] ما عنديش استعداد لأى تفسيرات .. إنت عزت ونفذت اللى انت عايزه، ولو يرضيك ويشبع كبرياءك إنى أقول لك، إنى اتهزمت، فأنا بقولهالك أهه .. أنا اتهزمت، ولو عايزني كمان أوطى على جزمتك

أبوسها ماعنديش مانع .. [تحاول أن تفعل ذلك، يمنعها "سليم" ويرفعها له، تنهمر في البكاء، وتدارى وجهها بيديها] بس لازم تتأكد من حاجه، إن اللي إنت عملته ده مش قوه دا منتهى الضعف، وجسمى الميت ده حتى لو

سلیم: نشوی أنا ...

نشوى: أرجوك كفاية كده بقى ...

سليم: أنا بحبك ...

سلىم:

نشوى: [منفعلة] وأنا بكرهك .. بكرهك ..

خدته، أنا برضه اللي إنتصرت..

أنا بجد بحبك .. ما عرفشى ده حصل ازاى ولا إمتى ولا عمرى تخيلت إنه يحصلى، بس اللى أنا متأكد منه إنه حصل، بلاش تقابلى الحبُ بالكره، وأنا ها أعوضك عن كل ده ..

نشوى: بإيه .. بالفلوس، بالمناصب، بالجاه، بالسلطان .. تفتكر

إن كل اللى تقدر عليه ممكن يعوضنى عن لحظة ذل زى اللى أنا فيها دى ...؟!!

سليم: صدقيني ها أحاول ...

نشوى: ماعدش ينفع ...

[تخرج منكسرة .. يُحاول "سليم" أن يناديها فلا يستطيع، يقف متجمدًا .. يجلس على حافة السرير في إعياء شديد .. إظلام فجائى ثم تُضاء عبره بؤرة ضوئية، نرى داخلها رجلاً مُلثمًا يُشهر خنجرًا في يده، يقترب بهدوء من "سليم"، ينقض عليه، يُفاجئه "سليم" بتفادى الطعنة، يتعاركان، أصوات موسيقى متوترة، نسمع صوت عيار نارى، ينهض "سليم "مُتحسسًا نفسه، ثم إنارة كاملة بعدها ..]

سليم: [منفعلاً] لأما تموتش .. ما تموتش .. مين اللي باعتك
.. انطق .. اتكلم ... [يموت الرجل، يقف "سليم"
شاردًا متأملاً يده الملوثة بالدماء] وأخرتها يا سليم،
هاتفضل كده على طول لا طايل سما ولا أرض، لا
فلوس مشبعاك ولا حب راضى بيك [يظهر صوته
الداخلى، نسمعه ولا نراه وهو يقوله] إيه الحياة

الغربية دي ... مالك، إنت مش لازم تعرف الضعف، ثم انت مش بتاع حب وكلام فارغ، إنت بتاع قوّة ومناصب و فلوس، إنت كان ممكن تاخدها غصب عنها وغصب عن أي شنب، اللذة ما يتفرقش إذا كنت هتاخدها برضاها ولا غصب عنها، لبه رفضت، إوعى تكون فاكر إنك حبيتها بجد، هوه أنا لسه هاقولك إنه الفرق بين الرغيه والحب ... الرغيه هاتكون أكبر لق كنت خدتها وهيه مرميه تحت رجليك، نظرة الخوف والذل اللي شفتها في عينيها كانت هاتزوّد رغبتك وتعليك لفوق أكتر وأكتر ... ليه رفضت ...؟ [بعود لصوته العادي] كفإنه نقى ... أنا عاور ها برضاها، أنا حبيتها بحد، عاور أحس بالدفا من لمبية إبديها، أحس إنها عايزاني بجد، هيه الوحيدة اللي نفسى أشوف في عينيها نظرة حب، ساعتها مش هابقي عاوز حاجه تاني م الدنيا ..

[تتعالى ضحكات صوته الداخلى بسخرية كبيرة، بينما هو يُقاوم سماع ذلك ... إظلام تدريجي ...]

اللوحة الثانية عشرة الخطوة اللى جايه معناها الجنون

[ساحة السجن، تظهر الأسوار عالية من بعيد، وفي عمق الفضاء المسرحي توجد منصة بميكروفونات كثيرة، كما يوجد ممشي طويل يصل جانبي خشبة المسرح بالمنصة، المساجين منتشرون داخل المكان كيفما اتفق، بعضهم يرتدي ملابس السجن العادية، والبعض الأخر يرتدي ملابس سجن فخمة جدًا .. تظهر "نشوى" في أحد الجوانب ومن حولها" يوسف وزكى "...]

ملیجی: هـ مُه لیه مجمعینا کلنا کده بربطة المعلم ...؟

مسجون (1): يمكن ها يعملوا اتحاد عام للمساجين ..

مسجون (2): بصراحه أنا مش طايق مساجين الإستثماري ...

مسجون (3): بصراحه ولا احنا طايقينكم ...

مليجي: يا إخوانا إهدوا شوية [يصعد لمكان مرتفع

ويخطب فى الجميع] اسمعونى لو سمحتم، احنا ما نعرفش همته مجمعينا ليه النهاردة، وأيًا كانت الأسباب، إحنا لازم ننسى خلافاتنا الصغيرة ونستغل الفرصة دى ونطلب كل اللى احنا عايزينه ..

مسجون (3): مظبوط .. بس احنا عايزين إيه ...؟

مسجون (1): شوفوا انتوا بقى ...؟

مسجون (3): ما تشوفوا انتوا وتخلصونا والمطلب اللي يعجبنا ها نشاور لكم عليه ..

مليجي: إحنا عايزين حاجات كتير ..

مسجون (4): زي إيه ...؟

[تتصاعد الكلمة على ألسنة الجميع ...]

مسجون (1): يعنى نطلب أكل زيادة مثلاً ...

مسجون (2): وأدوية ...

مسجون (4): برافو .. وهدوم جديدة ..

مسجون (3): وزنزانة أوسىع شوية ..

مسجون (2): وقهوة جوّه السجن ..

مسجون (1): و تليفزيون ودش وموبايلات ...

مسجون (4): ويكيفوا السجن ..الدنيا حر موت ف الإستثماري

مسجون (1): يعنى مفيش حد طلب يشوف مراته اللي في

سجن الحريم ...

مسجون (2): ولا قال أطمِّن على ولادى في سجن الأحداث..

ملیجی: یبقی نطلب کمان زیارات دوریة لیهم ..

مسجون (3): وفخطة تحسين السجون اللي جاية، نطلب إن حريمنا تسكن معانا في زنازينا ..

مسجون (2): لأيا جماعه، خلو المطلب ده اختيارى مش إجبارى .. مليجى: ونطلب كمان الحريه ..

[یظهر الجزء التالی کومضة عابرة مرت کحلم جمعی فی رأس" نشوی، یوسف، زکی "...]

نشوى: [متدخلة] الحريه مش هاتحسوا بيها أبدًا طول مانتو جوّه السجن .

يوسف: الحريه طير فارد جناحاته للسما لا مطر ولا عواصف تقدر تنزله الأرض

زكى: الحريه خيال ماحدش يقدر يسجنه ولا يمسكه ...

[عوده للواقع، يتعالى صوت الموسيقى، تسطع إضاءة قوية على المشى، بينما تخفت على المساجين، يدخل "سليم" وخلفه "نافع "من جهة، بينما يدخل الحاكم والمأمور من جهة أخرى، ثم يدخل "اشيخ جابر" ومعه بعض المريدين من جهة ثالثة... الجميع يتحلقون حول المنصة ...]

المأمور:

ها اخش في الموضوع على طول، إحنا مجمعينكوا عشان نقول للعالم إن احنا أكتر بلد فيها ديمقراطية وحرية رأى، النهاردة ها نختار بنفسنا الراجل اللي ها يحكمنا، والحقيقة الاختيار صعب لأننا قدام تلاته من أشد الرجال إخلاصًا ووطنية للبلد .. الراجل الأول [يشير للحاكم] الحاكم السابق والمشرف العام على سجون الحكومة، والثاني سليم بيه رجل الأعمال المعروف وصاحب السجن الإستثماري، والراجل التالت هو الشيخ جابر رجل الدين المعروف بحبة وإخلاصة للبلد .. ياللا بسرعة إنتخبوا واحد منهم .. [في هذه الأثناء بكون أحد

رجال "نافع" قد وزّع على المساجين وريقات صغيرة لكتابة اختياراتهم عليها ..] وطبعًا كلكوا عارفين المرشحين أكتر منى ومش محتاج أتكلم عن أى حد فيهم ولا عن إنجازاته الكتيرة اللى مغرقانا .. النفسه] توكلنا على الله وعلى مريدينا، واخدينها بإذن واحد أحد، الحلم بيقرب، مش ناقص غير إنى أعفقه في حضني عشان مايرجعش يهرب تانى ..

[يلحظ "سليم" أن " الحاكم "يعرج قليلاً ... ثم بحوار جانبي ..]

سليم: سلامتك .. وقعت على رجلك واللا إيه ...؟

الحاكم: وادغشيم كان عاوز يقتلني .. [ساخرًا]

ما كنتش عاوزه يموت عشان يبلغ رساله للى باعته ويقوله إنى بسبع ترواح..

سليم: [مُقاطعًا] إنت تعرف اللي باعته ...؟

الحاكم: إيديك لسه عليها آثار دم يا سليم بيه ...

سلبم: [ساخرًا] طب هدى أعصابك، إنت بتنفعل كتير،

وده مش في صالح راجل اختار السياسة سكته ..

الحاكم: كنت عاوز تقتلني ليه يا سليم ...؟

سليم: لنفس السبب اللي كنت عايز تقتلني عشانه ..

الحاكم: [مقاطعًا] إبتسم يا سليم بيه، التليفزيون بيصوّر

[بسخرية] وابقى قابلنى لو نفعت فحاجة ...

سليم: [بسخرية أعلى] لو كنت لسه على وش الدنيا، هابقي أقابلك ...

المأمور: يالا ... هانبدأ التصويت دلوقتي ...

[إظلام فجائى، تبقى فقط بؤرة ضوئية مسلطة على وجه "سليم "نظرته متجمدة، يبدو أنه يتخيّل شيئا ما، تُضاء بؤرة ضوئية بالتبادل على وجهى "سليم ونشوى "، يظهر صوتيهما من دون أن يتكلما ...]

سليم: لو وافقتى هاسىب الدنيا واجيلك، ضعفى معاكى قوة، وقوتى بعيد عنك ضعف

نشوى: إوعى تفتكر إنك حرر وتقدر تختار، السلطة إشترتك عبد ليها ومش هاتسيبك أبدًا ...

سليم: لما عرفتك رجعتلى حاجات كتير ...

نشوى: أخر نقطة بيضا جوّاك ماتت من زمان، إنت بقيت ملك لأفكارك، لطموحاتك، لاحتياجاتك ..

إنت مسجون، وكلمة الحرية ملهاش أي معنى

عندك .. إنت رايح لفين ..؟ عايز إيه ..؟ حاسب يا سليم بيه .. الخطوة الجاية معناها الجنون ..

[عوده للواقع، تعود الإضاءة للفضاء المسرحي "نافع " يفرز الأصوات "سليم" يفيق من شروده ..]

المأمور: [لـ نافع] بسرعة شوية يا نافع عشان نعرف النتيجة ...

نافع: [يرمى الأوراق بضيق] نتيجة إيه ...؟ الأوراق كلها بيضا مافيهاش أي حاجة .. ولا شخبطة حتى ..

الحاكم: مش ممكن ...

الشيخ جابر: يعنى إيه ...؟ مافيش حد اختارنى خالص ...؟! رضينا بوجع القلب وهوه مارضيش بينا ...

سلیم: ازای ... ورینی کده ...

[يلتقط "سليم والحاكم والشيخ جابر" الأوراق، فيتأكدون جميعًا من ذلك]

الحاكم: مش معقول ... والحل ...؟!

سلبم: [صارخًا في وجوه المساجين] إيه .. ما بتعرفوش

تكتبوا ..؟ طب اتكلموا .. قولوا أي حاجة .. عايزيني أنا واللا عايزين واحد منهم، واللا مش عايزينا كلنا .. ما تسكتوش كده .. انطقوا ..

لا حول و لا قوة إلا بالله ...

الشيخ جابر: الحاكسم:

[يأخذ جانيًا، يطلب رقمًا من تليفونه المحمول، بتحدث] أبوه سبادتك، بعد الدر اسة و افقت على العرض بتاعكم .. أه طبعًا ممكن تبعت مساجين دولتكم بتسحنوا عندنا هنا .. لأ عمولتي بعدين .. ها أجى لسيادتك أخدها بنفسى، وجهزلي مؤتمر صحفى عشان أقول فيه إن البلد أصبحت محمية خاصة للمساجين .. شكرًا ..

[ينظر " الحاكم " بقرف للجميع ويخرج .. " الشيخ جابر " يضرب كفًا بكف وهو يتلفت حوله في ذهول ثم يترك مريديه ويخرج، " سليم " ما زال يهذي بكلمات غير مفهومة، " نشوي " ومجموعتها ينهمرون في حالة من الضحك الهيستيري ...]

إيه .. خرستوا كلكوا .. نسيتو الكلام .. أنا سليم .. سليم: سليم بيه بتاع السجن الاستثماري، ها أوديكم كلكم هناك، بس اتكلموا، قولوا أي حاجة ..؟ أنا أهه ..

شایفینی مش کده .. سامعینی صح .. أنا سلیم .. [صارخًا] وافقوا بقی [یضربهم] اتکلموا ...

نشوى: [يظهر صوتها من دون أن تتكلم] حاسب .. الخطوة اللي جاية معناها الموت أو الجنون ...

سلبم: لأ ... مش أنا .. أنا سليم .. إنتوا اللي لازم تموتوا كلكوا ... ابعدوا عنى ... [يُطارد أشخاصًا وهميين، تُعاد جملة "نشوى " بتنويعات صوتية مختلفة ومختلطة بضحكاتها الساخرة، مما يسبب انفعالا جنونيًا لـ" سليم "] لأ .. إنتى اللي مجنونة [للمساجين] وانتوا كمان مجانين .. كلكوا مجانين .. ماحدش يمسكنى ..اللي يقرب هاضربه بالنار [يصوب يده

[تزداد ضربات الموسيقى، تتخللها جملة "نشوى" الأخيرة، بالإضافة لضحكات الجميع الساخرة، "سليم "يدور بينهم وحول نفسه كالمجنون وما زال منهمرا فى موجة هذيانه، الأصوات كلها معا تكون انفجارا صوتيا عاليا، ثم تبدأ فى التلاشى مع الإظلام التدريجى ... يُضاء ممر ضوئى قادما من عمق الفضاء المسرحى، يأتى عبره رجلا ضخما من بعيد، يمشى بصعوبة شديده، تحت إبطه

كمسيدس] إبعدوا عنى كلكوا ..

الأيسر عكازا، بينما يمسك عصا غليظة في يده اليمنى، نلحظ بالكاد " الشحاذ "، خطواته قلقة وثقيلة وتشكل إيقاعا خشنا، يلف جسدة بمجموعة كبيرة من الأعلام وأكياس القمامة، ذقنه طويلة، شعره منكوش، هيئته أصبحت رثة جدا، يلوح بعصاته في عنف وكأنه يدرء بها محاولات وهمية للهجوم عليه، يهذى بقوة ولكن بكلمات غير مفهومة، لكن يبدو عليه أنه يلعن الجميع، يظهر قادما من خلفه مجموعة أخرى من المهمشين، لهم صفات مماثلة تقريبا، إلا أنهم أشد عنفا منه، يتقدمون بغضب واضح للأمام، يصلون إلى حافة خشبة المسرح وقريبا جدا من الجمهور، يتأملون الناس في ذعر شديد، ثم يصرخون معا صرخة واحدة، مفزعة ومرعبة....

إبراهيم الخـُـسينـي 2003

أبراهيم الحسيني

أولا: السيرة الذاتية والعملية

- مواليد الشرقية 1970 ، كاتب وناقد مسرحي / سيناريست ، بكالوريوس علوم وتربية 1993 ، بكالوريوس الدراما والنقد من المعهد العالي للفنون المسرحية بأكاديمية الفنون 1998 ، دبلوم الدراسات العليا في الدراما والنقد 2000 ...
- أحد مؤسسي جريدة "مسرحنا" والمحرر العام لها حتى أواخر عام 2011 ، ويكتب عمودًا أسبوعيًّا بها يحمل عنوان " فواصل " ...
 - عضو نقابتي المهن التمثيلية والسينمائية ، عضو
 اتحاد كتاب مصر ، واتحاد الكتاب العرب ...
 - يكتب في الصحف والمجلات؛ ومنها : المسرح،

الفنون، الكويت، الحياة، القاهرة، الرافد، دبي الثقافية، كواليس، الثقافة الجديدة، ... كما قام بكتابة العديد من مقدمات الكتب لآخرين

- عضو لجان قراءة النصوص المسرحية ولجان تحكيم المسرح بمعظم مؤسسات وزارتي الثقافة والإعلام،
 كما أعد وأدار العديد من الندوات والورش الثقافية والإبداعية في مصر وبعض البلدان العربية ...
- •رأس قسمي الثقافة والفنون بجريدة أوان الكويتية (مكتب القاهرة) ديسمبر 2008 مايو 2010...
- كتب عدّة أفلام قصيرة؛ منها: فيلم "سعادة" إنتاج صوت القاهرة وإخراج وفاء عبد الله، والذي حصل على جائزة مهرجان الإعلام العربي 2009، وفيلم "أنا وشادي " / المركز القومي للسينما، وإخراج محمد صابر، وفيلم " ما تيجي نتفاهم " / هيئة

الاستعلامات ، إخراج أحمد مجدى ...

نوقشت أعمالة وكتاباتة ضمن مؤتمرات علمية
 بؤسسات وزارة الثقافة واتحاد الكتاب وأكاديمية
 الفنون، وأربعة جامعات أمريكية هي: هارفارد،

اندربیلت ، نیویورك ، میدل تینسی ...

حصل على العديد من الجوائز؛ منها جائزة القصة بالمجلس الأعلى للثقافة، محمد تيمور للإبداع المسرحي مرتان" عن مسرحيتي "سكات شرقي، الغواية"، د. سعاد الصباح / الكويت عن دراسة نقدية بعنوان " فعل التسييس في مسرح سعد الله ونوس"، المجلس الأعلى للثقافة للتأليف المسرحي ثلاث سنوات متتالية عن مسرحيات" وشم العصافير، عازف الناي، إخناتون "، ومرة رابعة عن مسرحية "جنة الخشاشين" والتي حصلت أيضاً على جائزة جريدة

- الجمهورية، اتحاد كتاب مصر عن مسرحية "متحف الأعضاء البشرية"
 - مثل بلاده ككاتب وناقد في معظم التظاهرات
 المسرحية والثقافية العربية والعالمية ...

صدر له

- الغواية / مسرحية / الهيئة المصرية العامة للكتاب / 1999.
 - وشم العصافير / مسرحية / المجلس الأعلى للثقافة / 2002.
 - أيام أخناتون / مسرحية الهيئة العامة لقصور الثقافة / 2003.
- متحف الأعضاء البشرية / مسرحيتان / هيئةالكتاب / 2004.

- مراكب الشمس / مسرحيتان / هيئة الكتاب / 2008.
 - جنة الحشاشين / مسرحية / دار ميريت للنشر / 2008.
 - كوميديا الأحزان / مسرحية / هيئة الكتاب / 2013.
 - أخبار .. أهرام .. جمهورية ، ومسرحيات أخرى/ اتحاد كتاب مصر / 2013.

الأعمال المترجمة

- معظم مسرحياته منشورة إلكترونياً داخل موقع www.kotobarabia.com
- ترجمت مسرحيته "كوميديا الأحزان "للإنجليزية، وكتبت عنها العديد من المقالات والدراسات النقدية في دوريات أمريكية مختلفة، كما نوقشت دراسات عنها في ملتقى كتاب المسرح الثاني بالشارقة / أبريل

2011 ، والندوة الدولية طنجة المشهدية بالمغرب / مايو 2011.

- تم تنفيذ معظم مسرحياته أكثر من مرة بجهات انتاجية مصرية وعربية وأمريكية مختلفة ؛ ومن هذه المسرحيات ؛ الغواية ، أخبار .. أهرام .. جمهورية ، كوميديا أيد الهون ، عشرة بلدي ، أيام إخناتون ، الكون كان ، وش الديب ، حديقة الغرباء ، سابع أرض. زفرة العربي الأخيرة ، متحف الأعضاء البشرية ، كوميديا الأحزان ، فلافيلو دوت كوم ، زنزانة لكل مواطن ..
 - كوميديا الأحزان ... بعد ترجمتها للإنجليزية قام أربعة مخرجين من أمريكا بتقديمها كل برؤيته الإخراجية ؛ وهم : ربيكا ماغور ، فرانك برادلى ،

جيمس ماكديرموت ، تيريسي كاميرون فرانسيس ،

وقام كلٍ منهم بتقديمها في أكثر من ولاية ؛ وهي

المسرحية المصرية الوحيدة التي حققت هذا الانتشار في أمريكا ..

| المحتوى |

* الإهداء
* المقدمة *
* اللوحة الأولى:
* اللوحة الثانية:«تصريح بالإنتحار؟»
* اللوحة الثالثة:«مخلوقات غريبة اسمها الشعب»
* اللوحة الرابعة:«تشكيلةعذاب»
* اللوحة الخامسة:«أنا بوست رجل حضرتك والالسة؟»

وحة السادسة:	
وحة السابعة:	
حة الثامنة:	-
وحة التاسعة: 105 بوا دماغكوا في الحيط»	
وحة العاشرة:	
وحة الحادية عشرة: 125 أجيبك لغاية أوضة نومي»	
وحة الثانية عشرة:وحة الثانية عشرة:وة اللي جاية معناها الجنون»	
وريف بالكاتب:	* الته

